

**Nzryr-krbz Pol Kx Ayrnrngr  
Mz Lr Korint  
Natq Ngr Nzaplxtqngr Mz  
Nzryr-krbz Pol Kx Ayrnrngr  
Mz Lr Korint**

Aposol Pol nide ncblo kx ryapwxtipx-kai Nr-pakxmrlz Korint, mz nzvzpx-krde krali, x dzbe lrmakxtr lc vzpxm mz nzwz-krde. ✧ Mz taon lc, tu elr madrka' nzklung. Lr Korint nzrmnq-zlwzng x nzrmwimi-abeaneng leplz kx trngiu krnalzdrng. Mzli kc tzrlxngiti-ate-ngrdr, nqmq nr drtwrdr apubele kxnmnc-mrbrng. Lr Korint kxnzrlxngiting nzklung kxtrngiulrJiu, kx trpnzng scdr da, x kxnzawz-nrbalqng. A' kx nznginidr bcnyr nzpipzng. Nzaki-lzbqng murde kxnznginidr bcnyrng nzobqszolr kztedrng kx trpnzng scdr da. Kzdung kxnzrlxngiting lcong nzrmwiming kxtrngiu krnalzdr. X nzglqpx-lzbqng mz zmatq ngr nzwzng kc tqkabz Mqn-grkxtr badr, myapxbz zmatq ngr nzymne-ngrbz mz Gct mz natq lr mrkzbleng. Mz drtwrdr nidr leplz kxnzyrplapxng x kxnzbrpeng mz nzvz-nqblq-krdr Jisz. A' trtingr.

Pol yr-kaipzle kc letz mz lrmakxtr mrkc Korint mzli kc, x letz lc kc ate. Mz letz kc kai, pnanatile nidr mz nqmq krdr kxtrka. Zbz mzli kc tqmnc-ngrde mz taon Efisz, ncblo nztqng nztwzblzr bade kc letz kx nzatwzlr-ngrbz lr Korint. X mz

---

✧ : Aposol 18:1-8

letz lc nzayzlu-ngrbzlr natqdeng. Trkrlzkuu nike tqyrle mz letz kc kai. A' opx angidr kx lr Korint nzpxtpx-ngrdr natq Pol x nzbatrpzlr mz leplz nzyrlqpx-lzbq-krdr mz zmatq ngr nzngini-krde aposol. Zbz Pol sc tqayzlu-mopwzle natqdr mz letz lc, tqyrle mz mzlr yiz 54—55 AD mz nibr nzrmcngr mz Jiszs, mz nzvzpx-krde kratq.

Kxmule-esz' yrbzle letz kc kai, a' lr Korint kxnzrlxngiting kxnzkqlung nzvz-nqblqbelr nqm q nr drtwr lr Grik kxnzmnc-mrbrng. Mz drtwrdr, dalr nrlc trmyapxpwzu, a' dalr nqm q kxtr kx myapx-zlwz. Mz nzm-krde lcde, mrlzbz badr nzrmwimi-krdr kx trngiu krnalzdrng, murde nrkrdrdq ncblo ngi dalr nrlc ka. X drtwr lc batrpzle badr nzvz-rbr-krdr mz nzyrlzng x mz nztulzkr nrkrdrdq mz nzbzng. X mou, mz drtwrdr Pol trnginideu aposol, murde trycmne-aboipwzu badr mz natq kx rblx, a' natqdeng opx angidr. X Pol wz mz nzrtwz-krde trau, x takitrde kxetu nzbatr-krbzle mz leplz nzrka-krbzlr da bade. Mz drtwrdr nzryapwx-krbz Pol badr takitrde kxnzrlxngiti-ateng, x trtakitpedeu nidr murde nzrlxngiti-krdr brpe. A' Apolos, kc tqalvztrle nidr mz nibr Pol, mz drtwrdr vz-nqblqle nqm q kr kxetu mz da lcdeng, x nzvecpx-lzbqm qng mz Pol, mz nzvz-nqblq-krdr Apolos. Mz letz lc, Pol atubqtibzle drtwrdr lcng tqvz-rbr, mz natqdeng kxpq zlwz.

### **Mrkcng Mz Letz Lc**

Lr Makxtr nzaki-lzbqng. [1:10-17; dckrlzde 3]

Mz drtwr kzdung leplz nzyrplapxkr Gct ngi dalr nzngqngungr. [1:18—2:16]

Kxnamu nzmncr Apolos badr lrmakxtr. [dck-

*rlzde 4]*

Lr Korint na-ayrplapxlr kxnzrlxngiting kcng  
tzapulr kxtrnzrlxngitiung. [*dckrlzde 5*]

Bzkq kxrlxngiti twzle kztede kxrlxngiti mz kot.  
[*6:1-11*]

Nrkrdrtdq kxnzrlxngiting sc Gct. [*6:12-20*]

Kxnamu nzyrlzngr kxtubq. [*dckrlzde 7*]

Kxnzrlxngiting bzkq nzmung dakxnzng kx  
nzkabz mz drka'. [*dckrlzde 8*]

Aposol Pol nzaotikr drtwrde le kztedeng  
nzmyaszpxlr nide. [*dckrlzde 9*]

Kxnzmung mz madrka' nzangioldr kxtrngiu Gct  
angidr. [*10:1—11:1*]

Nqm q kx takitrde olvz ngr lrmakxtr. [*11:2-16*]

Kzdung da nzakipxlr kxnzrlxngiting mz Nz-  
mungrkxtr. [*11:17-34*]

Mqngrkxtr kabzle zmatq kxmyapxbzng mz  
kxnzrlxngiting. [*12—14*]

Jiszs tulz-mop mz nzbzng mz nrkrdrtdqde  
angidr. [*dckrlzde 15*]

Nzatakqtilr trau mz nzwzkr lrmakxtr x kzdung  
kz natq mou. [*dckrlzde 16*]

1-2 Ninge Pol kc tqkqle Jiszs Kxnzmcp x mz  
nzngini-krnge aposol nede, mz nzvz-nqblq-krde  
me pnz drtwr Gct. Nigr ncdr mzlegu Sostenes  
rpibzkr bamu kx, “Nimu la!” Ryrbo bamu,  
nimu dzbe lr makxtr ne Gct mrkc mz taon kxetu  
Korint. Gct kqlele nimu amrlx mz nzngini-  
krmu leplz kxtr nedeng kx nawztrpzng bade  
mz nzaxvctr-krbzmu mz Mevalu Jiszs, da kc  
tqwai-kzle mz kxnzrlxngiting amrlx mrkcng kqlu  
tzangioldr Kxetu rgu Jiszs.

<sup>3</sup> Krka'-ngrne kx Trtegu Gct x Kxetu rgu Jiszs nakabzlr bamu zmrlz ngrdr kxmyalz x nzmnc-zpwxngr.

<sup>4</sup> Awi-zvzbo mz Gct, murde kabzle bamu zmrlz ngrde kxmyalz mz nzaxvctr-krbzmu mz Mevalu Jiszs.

<sup>5</sup> X mz nzaxvctr-krbzmu lc mz Kraes, dekc tqrngisc-ngrnamu zmatq kxmyapxbzng mz nzwztr-krbzmu mz Gct mz nzrkrlz-krmu nzalvztrngr angidr, x mz nzpipx-krmu natq Gct.

<sup>6</sup> X nzrngisc-krmu zmatq lcng atutrle natqnge mz nzpipx-krbo bamu da kx na-alebz Kraes bamu.

<sup>7</sup> Dekc mz nzodutr-lxblr-krmu, tqkao-ngrbz Gct zmatq amrlx kcng tqtakitrde nzale-krmu nzwz-krde, mzli ka tqobqtipx-ngrnamu nyzylu-krm Kxetu rgu Jiszs Kxnzmcpx.

<sup>8</sup> X Kraes sa naokatrle nimu mz nztu-amqngi-krmu mz nzrlxngiti-krmu nakrlzbzle nzbz-krmu o nyzylu-krmle, murde natubqamu mz nzobq-krde mz Mzli kx tqmatq na-ayzlu-ngrbz Gct da mz leplz.

<sup>9</sup> Gct sa na-angidatibzle da lcng bamu, murde yrlq-zvzle natq ngr nzesalz-krdeng. X sc tqkqlele nimu mz nzprtr-krmu mz nzodutr-krbzmu mz Mrlxde, Kxetu rgu, Jiszs Kxnzmcpx.

### *Lr Makxtr Nzaki-lzbqng*

<sup>10</sup> Mzlengeng x inwengeng, mz zmatq ngr Kx-etu rgu Jiszs Kxnzmcpx, rngidrlvz-ngrbo bamu mz natqnge kx xplr kx naesakitxpe nzotabl-krmu. A' drtwrmu naesz'ti murde ma tqakipx-lzbqamu.

11 Mzlangeng x inwengeng, xlrx kx otabramu, murde kzdung leplz ngr ma nyz Klowi nzvzmqng x nzpimlr bange nrpa lc.

12 Xlrx kx kzdung nimu nzrpilr kx, "Ninge vz-nqblqx Pol." X kzdung nzrpilr kx, "Vz-nqblqx Apolos," x kzdu-kzng "Vz-nqblqx Pita." X kzdu-moung nzrpilr kx, "Vz-nqblqx Kraes."

13 A' vz-rbramu. Murde nigu amrlx nzaxvctr-pzku mz Jiszs, x trpnzngr kx na-akipxle Kraes mz dzbede kxkqlu. Kzdung nimu nzrpilr kx nzvz-nqblqlr ninge. ?A' myx kxmule, ninge kc tqbzom mz kros mz nzarlapx-krnge nimu? ?X nzawrkxtrmu mz drtqng?

14 Trtingr! A' awitx-zlwzbo mz Gct kx trawrkx-trwxu nimu. A' awrkxtrtxpo Krispsz x Gaizs.

15 Dekc, trpnzngr kx narpile kx wrkxtr mz drtqng m z nznngini-krde oblamzng.

16 (Eu, a' sc tqdcppe mz drtwrnge kx awrkxtr-kzx Stifanas badr lr ma nyzde. A' trpnzngr kx dcp x kz mz drtwrnge kx awrkxtrx.)

17 Trawrkxtrwxu leplz kxkqlu murde Kraes atwzlr-ngrmle ninge mz nzipix-krnge Nrpakxm-rlz. X mz nzipix-krngele, trapuwxu ncblo kx rkrly-angidr x aetu-lzbq mz nzymne-krde. A' yrlqkixle me mrlzkibzle nzxlkr leplz le, murde nayrplatitr angidr nardr. Murde ma tqrpwa'-ngrne zmatq ngr Nrpa ngr Kraes nzbzo-krmle mz kros mz nzarlapx-krde leplz.

*Mz Drtwr Kzdung Leplz Nzyrplapxkr Gct Ng  
Dalr Nzngqngngr*

18 Mz drtwr leplz kcng tzo-zlilr lrpzki r Hxl, nrpa ngr nzbzo-krm Jiszs nidr mz kros ngi dalr

nzngqngungr. A' mz drtwrgu, nigu kcng tzo-zlilr lrpzki r Heven, nrpa lc aelwapx-ngrmle bagu kxnamu nzarlaxngr nigu mz zmatq ngr Gct.

<sup>19</sup> Murde natq Gct rpile kx, *“Sa naodatix nzyrplapxkr kxnzyrplapxng, x sa nakatpxbo nzrkrlzkr kxnzalvztrng.”* ☆

<sup>20</sup> Gct aovxiole nzrkrlzkr lr nrlc. Murde trpnzngr kxrlapx mz nzrkrlz-krde, o mz nzalvztr-krde mz Lou sc Mosis, o mz nzymneangidr-krde. A' leplz amrlx nzrlapxng mz nzbzokrm Jiszs mz kros.

<sup>21</sup> Murde Gct yrplapx-esz'ngr x yrlqle drtwr kx trpnzngr kx nakrlzle nide mz nzyrplapx-krde esz'-krde. A' abrtzlvzle nzarlax-krde leplz kcng tzlxngitilr nrpa kc tqyapwxtipxkr nigr aposol, kxmule-esz' mz nzobqkr leplz kxkqlu nrpa lc ngi dalr nzngqngungr.

<sup>22</sup> Murde lr Jiu nzrlxngiting mz nzrmc-krdr r kx kxmatq. X kxtrngiulrJiu nzrlxngiting mz nzxlr-krdr da kx vz-nqblqle nzyrplapx-krdr.

<sup>23</sup> A' trvz-nqblqkru drtwr lr Jiu o kxtrngiulrJiu lcng. Murde yapwxtipxkr nzbzokrm Kraes mz kros mz nzarlax-krde leplz. A' mz drtwr lr Jiu nrpa lc trngiu da kxmatq-esz'ngr x mz drtwr kxtrngiulrJiu ngi dalr nzngqngungr, x nzpxtpxngrdr rlilrdr.

<sup>24</sup> A' nigu kcng tqkqleng Gct, kxmule-esz' lr Jiu o kxtrngiulrJiu, glxku kx Kraes nide zmatq ngr Gct mz nzarlax-krde nigu x ni-kzde nou drtwr kxyrplapx kx yrlq Gct mz nzarlax-krde leplz.

<sup>25</sup> Kxmule-esz' nrpa ngr nzatwzlo-krm Gct Mr-lxde mz nzbzokrmle mz kros ngi dalr nzngqn-

---

☆ 1:19 Asaea 29:14

gungr mz nzobqkr kzdung leplz, a' nzyrplapxkr drtwr lc tqyrlq Gct myaszpx-zlwzle nzyrplapxngr amrlx sc leplz. X kxmule-esz' mz drtwr kzdung leplz Gct trpnzngr scde zmatq murde tr-rpwa'-ngrpwzleu nznribqngr Mrlxde, a' zmatq ngr Kraes mz nzbzo-krmle mz kros myaszpx-zlwzle zmatq amrlx sc leplz.

<sup>26</sup> Mzlehgeng x inwengeng, na-aoti ena drtwrmu nimu esz'-krmu. Murde mzli kc tqkqle-ngrbz Gct nimu, trkqluwamuu kxyrplapx mz nzobqkr leplz x trkqlu-kzwamuu kxnzetzung o kxnzvzpxmqng mz nqvi lr ncblo kxnzmyapxbzng.

<sup>27</sup> A' Gct mcpxle leplz kxnzkqlung kcng trnzsikluung, kxnzngqngung mz nzobqkr leplz, murde na-aelwapx-ngrbzle mz krkcng tzyrplapxng kx nzrkrlz-krdr trokatrleu nidr mz nzmnc-zpwx-krdr badr Gct. X mcpxle leplz txneng kxnzkqlung kcng trpnzngr scdr zmatq, murde na-aelwapx-ngrbzle mz leplz kxnzmatqng kx nzngini-krdr kxnzetzung x nznrgisc-krdr zmatq trokatrleu nidr mz nzmnc-zpwx-krdr badr Gct.

<sup>28</sup> X mcpx-kzle leplz kx nzmaneng x kxnzobqszong mz nzobqkr leplz mz nrlc ka, murde na-aelwapx-ngrbzle mz lr nrlc kx da kcng tqmyapxbz mz drtwrdr ngi brmrda mz nzobqkr Gct.

<sup>29</sup> Mz nzmu-krde lcde, trpnzngr kx naglqpx-lzbqbz mz nzobqkr Gct, mz nzrpi-krbzle bade kx myaszpxle kztedeng.

<sup>30</sup> Murde nzaxvctr-krbzku mz Mevalu Jiszs trvzpxpuu mz da kcng tqaleku x mz nqmq krgu, a' vzpxm mz nzwzkr Gct. Murde Gct yrlqle

drtwr kxyrplapx, kx nangi Jiszs kx na-atubqtile nigu mz nzobq-krde. X Jiszs kc naokatrle nigu, murde nanginigu leplz kxtr neng Gct. X ni-kzde kc naxpepxle nigu mz zmatq ngr alwx, murde namncku badr Heven.

<sup>31</sup> Dekc tqrpinger Nzryrnrgrkxtr kx, *“Doa kx rpile naglqpx-lzbq, naglqpx-lzbq-ngrde nike alebz Kxetu rde bade.”* ✧

## 2

<sup>1</sup> Mzlangeng x inwengeng, nadcpix mz drtwrmu kx vz-nqblq-kzx da lc tqpipebo bamu. Murde mzli kc tqvz-ngrmc bamu mz nzyapwxtipx-krbo nrpa ngr Gct, trglqpx-lzbqpou bamu mz nzrpi-krnge kx ninge ncblo kxyrplapx x kxsiklu. X tryapwxtipxpou bamu mz nzapu-krnge ncblo kx rkrlz-angidr x aetu-lzbq mz nzymne-krde.

<sup>2</sup> Murde aotipe drtwrnge kx mzli kc tqmnc-ngrgu, naycmnetxtr-ngrpwo Jiszs Kxnmcpix x nzbzo-krmle mz kros mz nzarlaxp-krde nimu.

<sup>3</sup> Mzli kc tqvz-ngrmc bamu, yangrngax x rnrti-lzbqnge mz zmwxl. ✧

<sup>4</sup> Nrpa kc tqyapwxtipxbo opx angidr x nzymne-krnge trapuleu natq ncblo kxrklz x kxyrplapx. A' nzyapwxtipx-krbole bamu vzmi da kx nzaelwapx-ngrdr zmatq ngr Mqngrkxtr.

<sup>5</sup> Murde nzrlxngiti-krmu ma tqtuoz mz nzyrplapx-krnge, a' natuopwz mz zmatq ngr Gct kc tqaelwapx-ngrde kx natqngeng amrlx da angidr.



### *Nzyrplapxngr Kx Vzpxm Mz Gct*

<sup>6</sup> Kxmule-esz' a' alvztr-ngrne nzyrplapxngr kx batrpz Gct mz leplz kx nzbrpeng mz nzrlxngiti-krdr. A' nzyrplapxngr lc trvzpxpuu mz leplz o mz kxnzeturung mz nrlc ka, mzli ka Kraes tryzluka-ngrmle. Murde zmatq ngr leplz amrlx sa na-ayrkrpxng mz nyzylu-krmle.

<sup>7</sup> A' nzyrplapxngr lc tqpipxbo vzpxm mz Gct. Krlc drtwr kc tqyrlq-pnzle mzli kc nrlc trnzwzka-ngrde. Drtwr lc tqayc-kapqle nakrlzbzle nzvz-krm Kxnzmcpx. Murde mz drtwr lc tqyrlqle, na-axvctrpzle nigu mz Mrlxde, murde naprtr-kzku mz nzmyalz-esz'ngr-krde. ✧

<sup>8</sup> Trpnzngr kxnzeturung mz nrlc ka kx rkrly nzyrplapxngr lc. Murde nzmu nakrlzlrle, e trnztqlvztrlrku Kxetu kc tqmyalz-esz'ngr mz kros.

<sup>9</sup> Trnzrkrly-krdr lc tqrpi-kai Nzryrngrkxtr kx, *“Trpnzngr kx rmc x xlr da amrlx kcng tqoliqti Gct mz nzrka-krbzle mz leplz kcng tzmrlztilr nide. X trpnzngr kx aoti drtwrde da lcng.”* ✧

<sup>10</sup> A' Gct atwzlr-ngrmle Mqngrkxtr mz nzaelwapx-krmle bagu drtwr lc tqyrlq-pnzle. Murde Mqngrkxtr krlzle da amrlx, kxmule-esz' drtwr Gct kc tqyc-kapq.

<sup>11</sup> Mqngr Gct esz'-krde kx krlztrpzle drtwr Gct, da kc tqwai doa, trpnzngr kx rkrlytrpz drtwrde, a' ngi txpwz nide esz'-krde.

<sup>12</sup> A' krlz-angidrku da kxmrlzting kcng tqkam Gct bagu, murde twzku Mqngrkxtr kc tqatwzlr-ngrmle, tqaelwapx-ngrmle da lcng bagu. Delc nzkrly-krgu drtwr ngr da lcng tqblepx-ngrbzle

mz drtwr kxtrnzrlxngitiung.

<sup>13</sup> X mz nzpipx-krbzku da lcng tqmrlzting, natq kcng tqpipxbzku kam Mqngrkxtr bagu. A' trnzvzpxpwung mz nzyrplapxkr leplz. Murde yokaetipxbzku da mz nzvz-nqblq-krde kxmu nzyokaetipx-krm Mqngrkxtr le bagu.

<sup>14</sup> A' kxtrnzrlxngitiung nzpctxpx-ngrdr da angidr kcng tzvzpxmqng mz Mqngrkxtr, murde mz drtwrdr ngi dalr nzngqngungr. Trnzkrzlru nztwz-krdr drtwr ngr nzalvztrngr angidr lcng, murde nzmncpx-krm Mqngrkxtr mz nabz doa kxrlxngiti, dekc tqtwz-ngrde drtwr ngr nza-lvztrngr angidr lcng x tqkrlz-ngrde nzmrlz-krdr.

✧

<sup>15</sup> Kxnzrlxngiting nzkrzlzr nzmrlzkr da angidr lcng, murde Mqngrkxtr mncpxm badr. A' rblxbz mz kxtrnzrlxngitiung nzkrzlz-zpwx-krdr nqmq nr drtwr kxnzrlxngiting.

<sup>16</sup> Da kc tqwai nzpikr Nzryrngrkxtr le kx, *“Trpnzngr kx rkrz drtwr Yawe. X trpnzngr kx takitrde nzyrlq-krbzle drtwr kx navz-nqblqle.”* ✧ Kxmule-esz' a' Mqngrkxtr kc tqmncpxm bagu okatrlc nigu mz nzvz-nqblq-krde me pnz drtwr Kraes.

### 3

*Nzaki-lzbqkr Lrmakxtr Aelwapx-ngrde Kx Nzrlxngiti-krdr Pobe*

<sup>1</sup> Mzlengeng x inwengeng, mzli kc tqmnc-ngrgu, trtakitrdeu nzymne-krbo bamu da kc tqwaibo mz leplz kcng tzvz-nqblqlr nzmrlzkr

Mqngrkxtr. A' ycmnebo bamu mz nzapu-krmu kxtrnzrlxngitiung o kxznzrlxngiti-ateng.

<sup>2</sup> Murde apubeamu itoto kx nzyqbgeng x trnz-mukang dakxznzng kxmngi. Delc tqalvztr-ngrne nimu nzalvztrngr kcng kai, murde nzalvztrngr lcng tqrbx, trnztakitrkaplr nimu.

<sup>3</sup> Murde vz-nqblqbeamu lrpzki kc pnz tqikzti-  
amu mz nzale-zvz-krmu alwx. A' trmnczpwz-  
muu mz nzrmailzkr Mqngrkxtr. Opx angidr kx  
nqm q krmu apubele nqm q kr kxtrnzrlxngitiung,  
murde dobuti-lzbqamu x otablr-zvzamu.

<sup>4</sup> X apu-kzamu nidr mz nzrpi-krmu kx, "Vz-  
nqblqx Pol," o "Vz-nqblqx Apolos."

<sup>5</sup> Bzkq akipx-lzbqamu mz nzvz-nqblq-krmu  
ninge o Apolos. Murde ngini-kzgr leplz x wztr-  
pzkr mz Gct mz nzokatr-krgr nimu mz nzrlxngiti-  
krmu, mz nzvz-nqblq-krde nzwzngkr kc tqkamle  
bagr.

<sup>6</sup> Mz nzwz-krgr lc, apux ncblo kc tqpe rtq kc  
tqngi natq Gct mz nabzmu. X Apolos apule ncblo  
kc tqpulilvzle rtq lc mz lue, mz nzalvztr-krde  
nimu. A' Gct kx rbatrpz mz rtq lc nzlvcpu-krde  
mz nzbtrtkr drtwrmu Jiszs.

<sup>7</sup> Mz nzmu-krde lcde, ncblo kc tqyapwxtipx-  
kaile Nrpakxmrlz x ncblo kc tqalvztr-ngrde nimu  
nzalvztrngr angidr lcng mz nibrde, trnzmyapx-  
pwzung. A' Gct kxmyapxbz, murde nide kc  
tqbatrpzle nzlu-krmu kxmrna x tqaetunepxle  
nzrlxngiti-krmu.

<sup>8</sup> Ncblo lcng li nzwz-krdr blepxngr mz nzvectr-  
krmlr leplz mz Jiszs. X Gct sa naxpele nidr navz-  
nqblqle kxmu nzwzkr ncblo kxes' mz nidr.

<sup>9</sup> Da kc tqwai-kzle mz nigr ncdr Apolos. Wztr-pzkr mz Gct mz nzale-krgr nzwzng r kc tqkamle bagr. Nimu doa neng Gct, a' trnginimuu doa negrng. Apuamu nrlanc nyz Gct x suti drtwrde nzlvclz-krm da kxmrlzting elr.

X mz kzdq mou nzymne-ebzpxngr, apuzamu kzdq ma kx atulz Gct nangi nyzde.

<sup>10</sup> Mz nzngini-krnge aposol ne Gct, abzox nzatulzng r makxtr nyzde Korint, krlcde nimu leplz nedeng. Vz-nqblqx zmatq ngr nzlrmztrngr mz nzwzng r ma, mz nzyrlq-kai-krnge nou rplz ngr ma lc. Mz nibrde, leplz sc tzvz-mopqng mz nzwzng r ma lc mz nzalvztr-krdr nimu. A' na-clvetio-lzbqng mz nzwzo-angidr-krdr mz nou rplz kc tqyrlq-kaix.

<sup>11</sup> Murde da amrlx natuo mz nou rplz lc tqngi Jiszs Kxnzmcp x. Murde nide esz'-krde lrpzki r nzarlaxkr Gct leplz. Bzkq doa kx rtwzm nzalvztrngr kzble mz nztekqtr-krde Jiszs nzngini-krde nou rplz angidr.

<sup>12</sup> Nzwzkr kxnzrlxngiting kx nzatuong mz nou rplz sa namrlz. Murde na-apule nzwz-ngrng mz gol, silvz, x rplz kxlqlwx kxlqngipx, kx trpnzng r nzangcng r. A' nzwzkr kzdu-kzng kxnzrlxngiting sa natrka. Murde na-apule nzwz-ngrng mz nounc, nabr, x lo.

<sup>13</sup> Mzli kc Kxnzmcp x nayzlu-ngr-mople mz Mzli Kxmatq, nzwzkr leplz kxes z' sa naopx angidr. Murde nzwzxliti-krde nzwzkr leplz nedeng sa na-apule nyr, x nzwzkr leplz kx nayc alo sa naprpxmqng mz nyr lc.

<sup>14</sup> Doa kx wz angidr mz nike wztiole mz nou rplz, sa namcle kx nzwz-krdeng trnzngcu mz nyr.

X Gct sa naxpele nide mz da kxmrlzting Heven.

<sup>15</sup> A' doa kx nzwz-krde ngc x yrkrto mz nyr, trpnz-moungr kx naxpengr Gct nide. Sa napule ncblo kx rlapx mz nzngckr ma nyzde, a' dztudeng amrlx yrkrxong. Murde sa narlapx Heven, kxmule-esz' trpnznggr da kx naxpengr Gct nide mz nzwz-krde mz nrlc.

<sup>16</sup> Nakrlz-angidramu kx Mqnggr Gct sc tqmnc mz mzlirmu, mz nzapu-krmu Mrkc Tqtr nyz Gct.

<sup>17</sup> X Gct sa naodatile doa kx alvztr-rbrle nimu x akipxle nimu, murde atrkatile lrmakxtr nyzde. X nzodatingr lc Hxl tqyc tqyc. Murde apuamu Mrkc Tqtr nyzde, kcng tqamnc-bekapxleng mz nzngini-krmu leplz kxnztr nedeng.

<sup>18</sup> Bzkq esabrti-lzbqamu mz nzrpi-krmu kx yrplapxamu! A' doa kx rpile yrplapx mz nzobqkr leplz, natekqtrle drtwrde x narlrpx-ngrbzle mz leplz nzrpi-krdr kx nide doa kxngqngu murde vz-nqblqle nqm q kr Gct. Dekc nangini-ngrde doa kxyrplapx mz nzobqkr Gct.

<sup>19</sup> Murde nzyrplapxkr leplz kcng trnzkrzlru Gct mane mz nzobq-krde. Da kc tqwai nzr-pikr Nzryrngrkxtr kx, *"Gct yrlqle nzrkrzkr kxnzyrplapxng mz nzapu-krde trtxki kc tqbatrpzle nzprtr-krdr elr."* ✧

<sup>20</sup> X kzdq kz Nzryrngrkxtr rpile kx, *"Yawe krlzle kx drtwr kx nzyrlq kxnzyrplapxng mane."* ✧

<sup>21</sup> Mz nzmu-krde lcde, bzkq glqpx-lzbqq mz nzvz-nqblq-krm kzdq ncblo. Murde Gct kabzle bamu da kxmrlzting amrlx mz nzaxvctr-krbzle nimu mz Kxnmcpx.

<sup>22</sup> Murde atwzlr-ngrmle ninge, Apolos, x Pita mz nzalvztr-krgr nimu. X wz-ngrde da amrlx mz nrlc ka mz nzokatr-krdr nimu. Kxmule-esz' luamu o bzamu, a' sa namrlzbx bamu. X kxmule-esz' da kx prtzbz bamu mzli ka o mzli kc navzm, a' sa nabatrpz Gct mz nzokatr-krde nimu. Da lcng amrlx scmung.

<sup>23</sup> Na-aoti drtwrmu kx nimu doa neng Kraes. X nide txpwz kx takitrde nzmailz-krde nimu murde nide Kxnzmcpz ne Gct.

## 4

### *Aposol Badr Lrmakxtr*

<sup>1</sup> Mz nzmu-krde lcde, nimu lrmakxtr na-apusr-ngrnamu nigr aposol badr kxnzacvlelr nimu kxnzawz neng Kxnzmcpz. Nzwz-krgr kx nza-prcm bagr nzpipx-krbzkz drtwr kc tqyrlq pnz Gct mz kxnamu nzarlax-krde leplz. Drtwr lc tqyrlq-kapqle mzli kc, a' mzli ka Kxnzmcpz aelwapxpe-ngrmle bagu.

<sup>2</sup> X krlzku kx doa kxnzawz kxmrlz na-angidati-zvzbzle natq Kxetu rde.

<sup>3</sup> Kzdung nimu nzpibqtilr nzwz-krnge. A' tryc-zlwzu mz drtwrnge nzrpibqtikr leplz. Murde trtakitrdeu nzpwxliti-kz-krnge nzwz-krnge esz'-krnge.

<sup>4</sup> Kxmule-esz' rpix kx trvz-rbrwxu mz nzwztr-krbo mz Kxetu rnge, a' trngiu drtwr kxtubq. Murde Kxetu rgu txpwz kx napwxlilitile ninge.

<sup>5</sup> Mz nzmu-krde lcde, bzkq pibqtiamu kxnzawz neng Kxetu, murde trkrlzkapzle mzli rde. A' na-aenzliamu nzyzlu-krm Kxetu, murde krlc mzli r nzpwxliti-krde leplz amrlx. Mzli lcde, sa

na-aelwapx-ngrde nqm̄ nr nabzgu keng tzyckapqng. X sa napipxle kxnz-vz-rbrng x kxnz-tubqng mz nzobqkr Gct.

<sup>6</sup> Mz lēngēng x inwēngēng, ycmne-ebzpx-ngrbo kxpipz nigr ncd̄r Apolos, mz nzatubqti-k̄rngē nimu. Navz-nq̄blq̄amu natq̄ kc tq̄rpilē kx, “Kx-namu nzaolvz-k̄rmu leplz navz-nq̄blq̄-txp̄wzle da kx pi Nzryrngrkxtr,” murde ma tq̄glq̄px-lzbq̄amu mz n̄zrpi-k̄rmu kx kzdq̄ ncblo myaszpxle kztedē mz nzobq-k̄rmu.

<sup>7</sup> ? Nimu kxnzētung kxnzmyapxbzng? ? N̄zrkrlz-k̄rmu myaszpxle kztemung? Trtingr! Murde n̄zrkrlz-k̄rmung amrlx ka-n̄rbalq̄bz Gct bamu. Bzq̄ glq̄px-lzbq̄amu. Murde n̄zrkrlz-k̄rmung trnzvzpxpwung mz nimu esz'-k̄rmu.

<sup>8</sup> ? Myx kxmule, r̄ngisc̄pemu da kxmrlzting amrlx keng tq̄suti drt̄wrmu kx v̄zpxmq̄ng mz Gct? Trtingr! Kxmule-esz' mz drt̄wrmu n̄zrlxngiti-k̄rmu brpe x nimu kxnzētung keng trtakitrpedeu nigr aposol nzokatr-k̄rgr nimu, a' esabrti-lzbq̄amu. Murde n̄zrlxngiti-k̄rmu pobe. Tra-pukru nimu mz n̄zngini-k̄rmu kxnzētung.

<sup>9</sup> Murde Gct r̄lr-n̄grbzle mz leplz nzatrkatik̄rd̄r nigr aposol, mz nzapus̄r-k̄rd̄r nigr ncblo kxnzm̄nc̄pxmq̄ng mz presin keng nanibq̄ng. Doa amrlx n̄zm̄cl̄r n̄zmyak̄r drt̄q̄gr, kxmule-esz' enjrl o ncblo.

<sup>10</sup> Mz drt̄wr leplz mz n̄rlc̄ ka, ngq̄nguk̄r murde yapwxtipxkr Kxnzm̄c̄px kc tq̄bzom mz kros. X opxm̄ kx tr̄pnz̄ngr sc̄gr zmatq̄. A' mz drt̄wrmu nimu kxnzyrplapxng kxnzr̄ngisc̄ng zmatq̄ ngr Gct. R̄lr-n̄grbz̄mu mz leplz nzamatq̄-k̄rd̄r nimu, mzli kc tzobq̄szo-kzlr nigr.

11 Abzo mzli kc x sc tqvzbe, tqrmctitxbzkr dale, tqbz-ngrgr lue, x tqpxinekr lrpz kxbxpli. Nziklatinedr nigr, x trpnzngr me mnclvzo-ngrgr.

12 Mnc-xgle-tpwzkr mqrgr esz'-krgr. Amrlzkr krkcng tzpizlr nigr. X trayzlupwzkru da kxtrka mz krkcng tzatrkatilr nigr.

13 X ycmnebzkr mz nrwz mz krkcng tzpibqtilr nigr. Krlzmle mzli ka leplz kxnzkqlung nzapusr-ngrdr nigr dcvi x brmrda.

14 Tryr-ngrpou natq lcng murde na-amyati-ngrbo drtqmu. Trtingr. A' murde mrlztix nimu mz nzapu-krmu doa nengeng. X suti drtwrnge nzatubqti-krbo nqmqr nr drtwrmu.

15 Kxmule-esz' rnginemu kxnzalvztrng kxnzkqlung, a' ninge tpxwz dela nangi trtemu. Murde yapwxtipx-kaipo Nrpakxmrlz bamu, mz nzvzmi-krnge nimu mz nzlxngiti-krmu Kraes.

16 Mz nzmu-krde lcde, rngidrlvz-ngrbo bamu kx navz-nqblqamu Jiszs, da kc tqwaix.

17 Dekc tqatwzlr-ngrbo Timoti bamu. Murde nide mrlxnge mz Kraes, kc tqmrlzti-zlwzx. X krlzx kx sa na-angidatibzle me pnz drtwr Kxetu. X sa na-adcpw-mopwzle bamu nzalvztr-krngeng amrlx x kxnamu nzmnc-krmu mz nzaxvctr-krbzmu mz Kraes. Murde alvztr-ngrne da lcng mz dzbe lrmakxtr kcng kqlu mrkcng tqalvztr-ngrne.

18 Kzdung nimu nzglqpx-lzbqpeng, murde mz drtwrmu kx trpengr nyzylu-krbo bamu.

19 A' nzmu kx tqrlrpxngr Kxetu ninge, sa navz-anibo bamu. Mzli lcde sa namcx namrlzu r zmatq kc tqycbz mz leplz lcng tzglqpx-lzbqng, kx ngi zmatq ngr Gct o trtingr.



<sup>20</sup> Murde zmatq ngr Gct trtuo mz nzymnengr, a' ycbz mz leplz kcng tzmncldbzng bade mz nzngini-krde King rdr. X zmatq lc tqaelwapx-lzbq-ngrde mz nzale-krdr nzwzkr Gct.

<sup>21</sup> ?Mz nzm-krde lcde, nike suti drtwrmu mzli kc navz-ngrbo? O naplzpxamu nzglqpx-lzbq-krmu, murde na-aodux nimu mz nivz. O navz zvz nzglqpx-lzbq-krmu lc, murde na-ayrplapx-zlwzx nimu.

## 5

*Ayrplapxamu Kxnzrlxngiting Kcng Tzapulr Kx-trnzrlxngitiung*

<sup>1</sup> Drtwrnge talvzotx zlwz mz nzxlr-krnge kx rlr-ngrbzmu mz kzdq ncblo kx mwimile krnalz trtede nzmnc-lxblr-krmu badr. Da kxtrka lc, kxmule-esz' kxnzmnc-mrbrng murde trnzrlrpx-ngrdru da lc.

<sup>2</sup> Rlr! ?Myx kxmule tqglqpx-lzbq-ngrnamu nzbrpekr nzrlxngiti-krmu? Nzmu navz-zlwzng drtwrmu alwx lc, x namaszlrpx-ngrnamu ncblo lc, murde natekqtrle nqm q nr drtwrde mz nzplzpx-krde alwx ngrde.

<sup>3</sup> Kxmule-esz' trmncpou bamu mzli ka, a' ninge la tqmncbo bamu mz mqngrnge, mz nzaxvctrkrbzku mz Mqngrkxtr. Delc mz zmatq ngr nzngini-krnge aposol, tqpq-zlwzng nzpi-krbole bamu kx na-ayrplapxamu ncblo lc, na-apule kx ninge kc tqmncbo bamu mrla.

<sup>4-5</sup> Mz nzm-krde lcde, mzli kc tqyrlwr-lxblr-ngrnamu, namaszlrpx-ngrnamu ncblo lc mz nzmnc-lxblr-krmu badr, mz zmatq ngr Kxetu rgu Jiszs. Nakatpxamu nide mz nzaclvekr Gct nide,

x na-aprcbzm nide mz mq Setzn, mz nzatrkatikrde nide. X murde mw x elx, natekqtrle nqm n r drtwrde x narlapx mz nzbz-alongr mz Mzli Kc Tqmatq na-ayzlu-ngrbz Gct da mz leplz.

<sup>6</sup> Namyangr drtqmu nzglqpx-lzbq-krmu mz nzbrpekr nzrlxngiti-krmu, mz nzrlr-krbzmu mz ncblo kxmule lc nzmnc-krde mz mzlirmu. Nakrlzamu kx alwx ngr ncblo lc, sa na-aprctile kzdu-kzng leplz, nzm narlr-ngrbzmu nzmnc-krmu badr, da kc tqwai yisti kxpipzne nzayrlvz-krde flawa atwrnrngr kx nangi bret.

<sup>7</sup> Mz drtwrgr, nigr lr Jiu, yisti ycmne-ebzpx-ngrde alwx. X mz nzvz-nqblq-krde nqm krg, katxpxkr yisti amrlx mz ma nyzgr, x sc tqakaputr-atemgr Nzamyangr mz nzngq-krgr bret kx trpnzng yisti ngrde. X mzli ka nalqngikzamu, mz nzkatxpx-krmu kxnzaleng alwx mz nzyrlwr-krbzmu badr. Takitrde nzale-krmu da lc, murde Kraes alqngile nimu, mz nzngini-krde nei sip kx ngi blz kc tznibq mz nzarlapx-krde nigu mz zbq ngr Nzamyangr.

<sup>8</sup> Delc mzli ka tqmrlzng nzakaputr-krmgu Kraes nzngini-krde nei sip ne Gct, mz nzmncngr kxtubq kx apule bret kx trpnzng yisti ngrde. X nakatxpxku nqm krgu kcng mzli kc tqtrka,

tqdrka'ngr, mz nzapu-krdr yisti. \*

<sup>9</sup> Mz letz kc tqyrbo bamu mzli kc, pipebo bamu kx bzkq prtrpzm badr leplz kcng tzrmwiming doa kxtrngiu krnalzdr.

<sup>10</sup> A' trycmnetr-ngrpou kxtrnzrlxngitiung kcng tzrmwiming kxtrngiu krnalzdr, x tzkcmnz-ngrng, tzesabrng, x tzangioler da kcng trnznginidru Gct angidr. Murde krlzx kx rblx nzyrlqpx-lzbq-krbzmu mz leplz kxnmulr lcnng amrlx, murde nzmncng mz nrlc tulvzo.

<sup>11</sup> A' ycmnetr-ngrbo leplz kcng tzipilr nzvz-nqblqpelr Jiszs, a' nqm q krdr trka. Bzkq prtrpzm mz leplz kxnmulr lcnng tzrmwiming kxtrngiu krnalzdr, tzkcmnz-ngrng, tzangioler kxtrngiu Gct angidr, tzipibqting leplz, tzmng-zlwzng, tzesabrng, x kzdung kz da kxnmulr lcnng. X bzkq mu-lxblr-kzamu badr, murde ma tzipilr kx drtwrmu esz'ti badr mz nqm q krdr lcnng tqtrka. A' kapx-lzbq-zvzmamu badr.

<sup>12</sup> Trtakitrdeu nigu kxnrzrlxngiting nzayrplapx-krngu kxtrnzrlxngitiung mz nqm q krdr lcnng tqtrka. A' suti drtwr Gct nzayrplapx-krmu leplz kcng tzipilr nidr lrmakxtr, a' sc tzvz-nqblqlr nqm q lcnng tqtrka.

<sup>13</sup> Murde Gct esz'-krde kx na-ayrplapxle kx-

---

\* **5:8** 5:7-8 Mz Nzryrnrkxtr kc kai, mzli kc lr Israel tzmnc-ngrdr Ijpt, Gct rpibzle badr kx narnibqng nei sip x mepyr ngrdr nakilvztrlr mz naonrx ngr ma nyzdrng. Murde enjrl kc nanibqle kzdung lr Ijpt namya-ngrde ma nyzdrng. Krlc Nzamyangr kc kai. [Nzrlaszng 12:1-36] X ngi kz rxx ngr Kraes nzbzo-krmlc nigu mz kros. Mz Nzryrnrkxtr kc ate, nzrpibz 'Nei Sip ne Gct,' murde Gct ipqpxle alwx rgung mz nzyrleo-krm mepyr ngrde. [Mak 14:12; 1 Pita 1:19]

trnzprtrpwzung mz lrmakxtr. X rpile mz Nzryrn-grkxtr kx, “Maszlrpx-ngnramu leplz kxdrka'-ngrng murde ma tzprtrpzlr bamu.” ☆

## 6

### *Bzkq Twzq Kztem Kxrlxngiti Mz Kot*

<sup>1</sup> Mz nzotablkr kxnzrlxngiting, bzkq vzmibzmu nidr mz kxtrnzrlxngitiung mz nzokatrngr. A' otiamu dq kztemu kxrlxngiti mz nzokatr-krde nimu nzatubqti-krmu nzotablkrdr.

<sup>2</sup> ?Myx kxmule, trkrlzwamuu kx mzli kc nayzlu-ngrm Kraes, nigu kxnzrlxngiting sa na-acleku leplz amrlx mz nrlc? Mz nzmurde lcde, takitrde kxnzrlxngiting nzatubqti-krdr nzotablkr kztedr kxnzrlxngiting.

<sup>3</sup> ?X trkrlzwamuu kx sa na-acle-kzku enjrl? ☆ Kx tqmule lcde, tr-rblxu nzatubqti-krmu da amrlx mzli ka mz nrlc ka.

<sup>4</sup> Mz nzotablrng kxmule lcng, takitrde kzdq doa mz lrmakxtr kxnzamatqng nzatubqti-krdele.

<sup>5</sup> Rlr! Namyangr drtqmu! ?Myx kxmule, trpnzng doa kxes' mz nimu kx narde mrlztipx, kx krlzle nzatubqti-krbzle da lcng bamu?

<sup>6</sup> Murde xlrk kx mzli ka kxrlxngiti delc tqtwzle kztede kxrlxngiti mz kot. X ngi da kx trka-esz'ngr, nzpibqti-lzbq-krdr mz mz kxtrnzrlxngitiung.

<sup>7</sup> Nqm q ngr nztwz-lzbq-krmu lc mz kot, aelwapx-angidr-ngrde kx vz-rbramu. A' mzli kznike kztem kxrlxngiti atrkati-ngrde nim o pnatibzle dztum, mrlzvxix trnztwz-krmleu mz

☆ 5:13 Lou Kcpwz 17:7 ☆ 6:3 Sam 149:9; Nzaelwapxng 20:6

kot. Murde mrlz nzrlrpxngr nzatrkatikrde nim myaszpxle nzovxiokr Setzn nimu rllrmu mz nztwz-krmle mz kot. ☆

<sup>8</sup> A' apubeamu kxtrnzrlxngitiung, mz nzangqnguti-krmu x nzatrkatikrmu leplz, kxmule-esz' kztmung kxnrzlxngiting.

<sup>9</sup> Nakrlz-angidramu kx leplz kxdrka'-ngrng tr-naprtrung Heven. Bzkq esabrtilzbqamu mz nzrpi-krmu kx nimu leplz neng Gct, mzli lcpwz tqmncbeamu mz nqmq lcng tqtrka. Murde Gct sa napxtpx-ngrde leplz amrlx kcng tzalelr da lcde seng: nzmwimingr kxtrngiu krnalzdr, nzmwimikr ncblo ncblo kztede o olvz olvz kztede, nzangiongr kxtrngiu Gct angidr,

<sup>10</sup> nzpnangr da, nztrkibrngr, nzmrmq-zlwzng, nzrpibqtingr leplz, nzesabrtingr leplz, x kzdu-kzng da kxnmulr lcng. Leplz kxnmulr lcng, trtxpnzng nzmnc-krdr badr Gct Heven. ☆

<sup>11</sup> Mzli kc ena kzdung nimu kxnmulr lcng. A' mzli ka trtakitrpedeu nzale-krmu da lcng. Murde Gct ipqpele nimu mz nzkatx-krde alwx ngrmung. X kqlepele nimu mz nzngini-krmu leplz nedeng kxnrztrng. X atubqtipele nimu mz nzobq-krde mz nzaxvctr-krbzmu mz Kxetu rgu Jiszsz Kxnmcpz mz zmatq ngr Mqngkxtr.

### *Nrkrdrtqmu Sc Gct*

---

☆ **6:7** Rom 12:17; 1 Tesalonika 5:19; 1 Pita 2:19-21 ☆ **6:10** Nzrlaszng 20:3-4, 14-17; Livae 18:6-23; 19:4, 11, 13, 16; 20:10-21; Lou Kcpwz 4:15-31; 5:7-8, 18-21; Nzyrplapxng 10:1; Asaea 57:17; Jeremaea 6:13-15; Matiu 15:19; Mak 7:20-22; Luk 12:15; Rom 1:26-32; 13:13; 2 Korint 12:20-21; Galesia 5:19-21; Efiszsz 4:3; 5:18; Kolosia 3:8; 1 Timoti 5:14; Taetus 3:2; Jemes 4:11; 1 Pita 2:1; 4:3

12 Mwx kzdq nimu narpile kx, "Nzrlr-ngrm bange nzale-krnge da kx suti drtwrnge, murde trmnclzpepou mz zmatq ngr Lou sc Mosis." A' rpibo bamu kx, "Eu, a' kzdung da trnzoka-trlru ninge nzmnc-aepztr-krbo mz Gct. Murde kxmule-esz' trmnclzpewxu mz lou mz nzaxvctr-krbo mz Jiszs, a' yrlqpx-lzbqngc mz doa x da amrlx kx nzkrzlzlr nzamnclz-krbzlr ninge badr."

13 Mwx kzdq nimu narpile kx, "Mzli kc nelzngc tqbrtale-ngrde, mrlz nzaputrngr nide dakxnzng." Murde mz drtwrmu mrlz nzvz-nqblq-zvz-krmu nike suti drtwr nrkrdrdqmu. Kxmule-esz' da zpwxtx kx sa nabzku nzm trnamukuu, a' Gct sa natekqtrle nigu x nrkrdrdqgu kalr Heven. X mzli lc trpengr nzsutikr drtwrgu dakxnzng. A' vz-rbramu mz nzrpi-krmu kx mrlz nzale-krmu da amrlx kx suti drtwr nrkrdrdqmu. Murde Gct wz-ngrde nrkrdrdqgu mz nzwztr-krbzku mz Kxetu rgu Jiszs. A' nrkrdrdqgu trngiu dalr nzalengr alwx mz nzrmwimi-krngu kxtrngiu krnalzgu. Nrkrdrdqgu sc Kxetu, murde bz-ngrde nzarlapx-krde nigu.

14 X Gct, mz zmatq kcpwz tqatulz-ngrmle nrkrdrdq Kxetu rgu mz nzbz-krde, sa na-atulz-kzple nigu mz nzbz-krngu kalr.

15 Nadcpz mz drtwrmu kx nrkrdrdqmu nzaxvctrpznzng mz nrkrdrdq Kraes. ?Myx kxmule, mz nzngini-krngu nrkrdrdq Kraes, tqrpi-ngrnamu kx takitrde nzbatr-krbzmu mz kzdq nimu nzaxvctrkzpz mz nrkrdrdq srlx? Bzkqtx pnz!

16 Murde mzli kc ncblo tqmwimi-ngrde srlx nznginipedr leplz kxesz'. Murde Nzryrngrkxtr alvztr-ngrde kx mzli kx leplz kxnzling nzmwimi-

lzbq-ngdrdr, “Doa lcng li nznginipedr nrkrdrdq x leplz kxesz'.” ☆

<sup>17</sup> A' mz nzaxvctr-lzbqpe-krbzme mz Kxetu Jiszs Kraes, prtrpeq mz Mqngr Kraes.

<sup>18</sup> Mz nzmukrde lcde, yrlqpx-lzbq mz nzmwimingr kxtrngiu krnalzm. Murde alwx lc nzatrkatikrde nrkrdrdq myaszpx-zlwzle alwx amrlx. Mzli kc tqrmwimi-ngrn kxtrngiu krnalzm, atrkatig nrkrdrdqm esz'-krm. X mou atrkati-kzq nzesz'ti-krmu mz Jiszs.

<sup>19</sup> ?Myx kxmule, trkrlzwamuu kx nrkrdrdqmu ngi Mrkc Tqtr nyz Mqngrkxtr mz nzmncpx-krmle elr? Mqngrkxtr lc tqkabz Gct bamu. X nrkrdrdqmu scdeng.

<sup>20</sup> Murde Gct xpepxpele nimu mz narnabr kxlqlwx mz nzbzo-krm Mrlxde mz kros, murde nanginimu leplz angidr nedeng. Mz nzmukrde lcde, rlr-ngrbzmu nrkrdrdqmu nangi dalr nzamatqngr Gct.

## 7

### *Nzalvztrngr Mz Nzylzng*

<sup>1</sup> Mzli ka sutipe drtwrnge nzayzlu-krbo natq kcng tqveatimamu mz letz scmu. Mz letz lc, rpianu kx mz drtwrmu Gct abrtzlvzle ncblo kx trmwimileu olvz rde. Mz drtwrnge mrlz trnzylz-kru ncblo x tr-rmwimiu olvz. A' Gct trabrtzlvzleu da lcng nzmyaszpx-krde kzdung kz da.

<sup>2</sup> Mz drtwrnge, kxmule-esz' kzdung da kxmrlz nzvzpxmqng mz trnzylz-ngru, a' doa kcng tzsuti

☆ **6:16** Nou 2:24; Matiu 19:5; Mak 10:8; Efisz 5:31

zlwz drtwrdr nzrmwimingr leplz, mrlz nzyrlz-krdr. Murde leplz kxnzkqlung nztaong mz alwx ngr nzrmwimingr kxtrngiu krnalzdr.

<sup>3</sup> X mz nzyrlzng, ncblo narlr-lzbq-ngrbz mz olvz rde. X wai-kzle olvz narlr-lzbq-kz-ngrbz mz ncblo ngrde, mz nzmwimi-krde krnalzde mz nzyrlzng. X bzkq nzpx-ngrdr nzrmwimingr, murde ma kzdq nidr tqtao mz alwx.

<sup>4</sup> Murde nrkrdrdq olvz trscpleu esz'-krde, a' sc kz ncblo ngrde. X wai-kzle nrkrdrdq ncblo trscpleu esz'-krde, a' sc kz olvz rde, mz nzngini-krdr nrkrdrdq x leplz kxesz'.

<sup>5</sup> Mz nzmu-krde lcde, bzkq px-ngrn nzrlr-krbzme nrkrdrdqm mz kztem, a' ngi txpwz mz mzli kxpipz mz nzkrka'-krmu mz kzdq da, mz nzesz'tikr drtwrmu. X mz nibrde namwilxblr-mouamu, murde ma Setzn tqatalzle kzdq nimu mz nzmwimi-krde doa kx trngiu krnalzde, murde rblxbz bade nzxplrlvz-krde nrkrdrdqde.

<sup>6</sup> Naopx angidr kx nzrlr-ngrbz bamu trnzmwilxblr-krmuu mzli kxpipz. A' bzkq rpiamu kx ngi natq kx kapxbo kx navz-nqblq zvz leplz.

<sup>7</sup> Mz drtwrnge, mrlz leplz amrlx trnzyrlz-krdr x trnzmwimiung leplz kz, da kc tqwaix. A' Gct kabzle zmatq ngr nzmnc-kamelrgr mz kzdung leplz, x ka-kzpzle nzyrlzng mz kzdu-kzng leplz.

<sup>8</sup> Rlxti-kzpa'mu bange nike na-ale leplz kcng tzabzopeng. X mz drtwrnge, mrlz trnzyrlz-krdr, da kc tqwaix mz trnzyrlz-krngeu.

<sup>9</sup> A' leplz kcng tqrbxlbz badr nzxplrlvz-krdr nrkrdrdqdr, mrlz nzyrlz-mou-krdr. Murde ma nzpqkr nzkcmnz-krdr mz nzrmwimingr leplz tqataole nidr mz alwx.



10 Kxetu Jiszs kapxle natq kx, “Bzkq axtx-lzbqamu!” X aprcho natq lc bamu, nimu kxnzr-lxngiting kcng tzyrlzpeng.

11 A' leplz kcng tzaxtxdr krnalzdr, bzkqpe nzyrlzng, a' nzm u kx tzyrlz-moulr, nangi txpwz krnalzdr kcng kai. ✨

12-13 X natq kx kapxbo bamu, nimu kxnzrlxngiting kcng tzyrlztilr doa kxtr-rlxngitiu, nide sele. Nzmu krnalzm kx tqsutu zvz drtwrde nzyrlz-krmu ncd, bzkq axtxbzme nide. Kxetu rgu trpileu da lc, a' pibo bamu.

14 Nzyrlzng kxmule lc, trngiu da kxtrka mz nzobqkr Gct. A' Gct amrlzle nzyrlzng lc murde kzdq nidr rxngiti. X amrlz-kzle doa nedrng. A' doa ngr nzyrlzkr kxtrnzrlxngitiung, trnzprtrpwzng mz nzamrlzkr Gct.

15 A' nzm u krnalzm kxtr-rlxngitiu na-axtxde nim, rlr-ngrbz nzvz-krde. Nzmu navzle, trngiu alwx ngr kxrlxngiti mz nzobqkr Gct. Murde suti drtwr Gct kx nrwx naycpxm mz nabz kxnzrlxngiting.

16 A' nzm u krnalzm kxtr-rlxngitiu trnavzleu, mrlz nzmnc-lxblr-krmu. Murde mw x elx krnalzm lc sa nalxngiti-kzle Jiszs mz nzmnc-lxblr-krmu.

17 Alvztr-zvz-ngrne kzdq nqm q mz dzbe lr-makxtr mrkcng tqvzkixng. Na-abrtzlvzq nzmnc-krm mz nzmncngr kcpwz tqmnc-ngrn mzli kc tqrlxngiti-ate-ngrn. Murde krlc nzmncngr kx yrlqbz Gct bam.

---

✨ **7:11** Lou Kcpwz 24:1-4; Jeremaea 3:1; Malakai 2:16; Matiu 5:31-32; 19:8-9; Mak 10:2-12; Luk 16:18

18 Nzmu kx tzpakrpem mzli kc tqrlxngiti-ate-ngrn, bzkq katxq r kx ngr nzrpakrngr. X nzmu kx trnzpakrkap mzli kc tqrlxngiti-ate-ngrn, bzkq twzq r kx lc.

19 Murde trngiu nzrpakrngr x trnzpakr-ngru kx myapxbz mz drtwr Gct, a' da kx myapxbz nzvz-nqblq-krm natqde.

20 Nimu amrlx namncamu mz nzmncngr kcpwz tqmnc-ngrnamu mzli kc tqrlxngiti-ate-ngrnamu.

21 X mou, nzmu kx tqnginim kxnzawz-nrbalq mzli kc tqrlxngiti-ate-ngrn, bzkq kxne drtqm. Murde krlzq nzwztr-krbzme mz Kraes kxmule-esz' nim kxnzawz-nrbalq. A' nzmu kxetu rm kx tqaopxbzle drtqm, murde trmnclzpepwzmeu bade, e mrlz nzvzpe-krm.

22 Murde krlzq nzwztr-krbzme mz Kxetu rgu kxmule-esz' drtqm opx o trtingr. Murde kxnzawz-nrbalq kxrlxngiti trmnclzpepwzu mz zmatq ngr alwx. X kxtrnzawz-nrbalqu kxrlxngiti amnclz-lzbqzbz mz zmatq ngr Kraes.

23 Murde Gct xpexle nimu mz narncbr kxlqlwx mz nzbzo-krm Mrlxde mz kros. X mzli ka nipemu leplz nedeng. Bzkq rlr-ngrbzmu mz leplz nzpi-krbzlr bamu kx namnclz-mopwzmu mz zmatq ngrdr mz nzngini-krmu kxnzawz-nrbalq nedrng.

24 Mzlengeng x inwengeng, namncamu mz nzmncngr kcpwz tqmnc-ngrnamu mzli kc tqrlxngiti-ate-ngrnamu, mz nzmnc-xgle-krmu nzokatrkr Gct.

25 Veati-kzpa'mu bange nzycmnetr-krnge mz doa kcng trnzryrlzkang. Trpnzngr natq kx kam

Kxetu rgu kx naycmnetrngr mz da lc. A' sa napipxbo nzaokrnge drtwrnge, murde mz nzryckr drtwr Kxetu, batrple bange nznegini-krnge ncblo kx takitrde nzbtrtkr drtwr leplz le.

<sup>26</sup> Mz drtwrnge, mrlz trnzryrlz-kru leplz lcng, murde mzli ka mzli r nzatrkatizlwngr kxnzrlxngiting.

<sup>27</sup> Nzmu kx tqyrlzpeq, bzkq axtxbzme kernalzm. A' nzmu kx tryrlzwq, trmrlzu nzrtangrti-krm kx nayrlztiq.

<sup>28</sup> A' nzmu nayrlzq, trngiu alwx. X nzmu olvi kxmnc-kamelr nayrlzle, trngi-kzu alwx. A' mz mzli r nzatrkatigr lc kxnzrlxngiting, leplz kcng tzyrlzng nzxpukrdr sa naetunepx mz nzaotikr drtwrdr nzatrkatigr kernalzdrng. X suti drtwrnge kx da lcng bzkq nzprzbnzng bamu.

<sup>29</sup> Mzlangeng x inwengeng, nadcpz mz drtwrmu kx mzli nyzgu mz nrlc ka mz nzwztrkrbzku mz Kxetu rgu mrbcnepwz. Nimu kcng tzyrlzng nzwztrkrbzmu mz Kxetu namyaszpxle nzwztrkrbzmu mz kernalzmung.\*

<sup>30</sup> Bzkq nqmz ngr nzmnc-krmu batrpzle trnzwztrkrpwzmuu mz Kxetu. Kxmule-esz' drtwrmu vz zlww o abrtz-zlwwamu o xpeamu da kxmrlz, a' navz zvz nzwztrkrbzmu bade.

<sup>31</sup> Kxmule-esz' mncamu mz nrlc ka, a' bzkq kxne drtqmu dalr nrlc ka. Murde nzlu-krmu x dztumung sa namrbr-aning.

<sup>32</sup> Trsutiu drtwrnge nzxkr mz drtqmu dalr nrlc ka, myapxbz nimu kxnzyrlzng. Murde ncblo

---

\* **7:29** A' bzkq yrlqpx-lzbqamu mz nzmrlzti-krmu x nzaclve-krmu kernalzmung x doa nemung.

kxtryrlzu krlzle nzwztr-krbzle mz Kxetu mz nabzde atwrnrngr x nzaotikr drtwrde kxnamu nzabrtzlvzkr Gct nide.

<sup>33</sup> A' ncblo kxyrlz yc zlvz mz drtwrde dalr nrlc ka. X suti kz drtwrde olvz rde nzabrtzlvz-krde nide.

<sup>34</sup> Delc, na-aotingr drtwrde Kxetu rde x olvz rde nzabrtzlvz-krdr nide. Da kc tqwai-kzle mz olvz. Murde olvi kxtryrlzu krlzle nzwztr-krbzle mz Kxetu mz nzrlrpx-lzbq-krbzle bade mz nrkrdrdqde x mz nabzde atwrnrngr. A' olvz kxyrlz yc mz drtwrde dalr nrlc ka. X suti kz drtwrde ncblo ngrde nzabrtzlvz-krde nide.

<sup>35</sup> Krlc tqpi-ngrbole, mwx naokatrpo nimu, murde nakrlz-angidramu nike na-aleamu. Trkapxpou natq kx xplr kx bzkq yrlzamu. A' rngidrlvz-ngrbo bamu nzmcti-krmu da kx namrlzbx bamu mz nzmnc-krmu, murde bzkq da kx atrkatile nzwztr-krbzmu mz Kxetu.

<sup>36</sup> Rlxti-kzpa'mu bange nzymnestr-krnge mz trte kx tr-rlr-ngrpwzleu mz inyxde kxmnc-kamelr nzyrlz-krde. Nzmu ncblo lc narpile mzli ka kx vz-rbr mz nzrpwa'-krbzle mz inyxde nzyrlz-krde mzli kc, e mrlz nzrlr-krbzlele bade. Myapxbz mzli lc tqyc-ngrbepz mzli r nzngine-krde. Krlc trngiu alwx.

<sup>37</sup> A' nzmu drtwr ncblo lc natu-amqngile kx mrlz inyxde trnzyrlz-krdeu, x trpnz-moungr da kx aelwapx-ngrde kx olvi lc nayrlz, e ncblo lc trvz-rbru mz nzvz-nqblq-krde me pnz drtwrde.

<sup>38</sup> Mrlz nzyrlz-krde o trnzyrlz-krdeu. A' mz drtwrnge, mrlz olvi lc trnzyrlz-krdeu, murde mzli ka mzli r nzatrkatizlvzngr kxnzrlxngiting.

†

<sup>39</sup> Mz nzyrlz-moungr, napi-mopwo bamu kx doa kxyrlz mnctr-alobz mz krnalzde, nakrlzبزle nzbzkr kzdq nidr. A' nzbzkr kzdq nidr ayrkrpxle nzyrlz-krdr. X nzrlr-ngrbz mz krkc tqlu nzyrlz-mou-krde, a' ngi txpwz mz doa kxrlxngiti.

<sup>40</sup> A' mz drtwrnge, sa na-abrtz-zlwz-ngrde trnzyrlz-krdeu, mz mzli r nzatrkatizlwzng r lc kxnzrlxngiting. X lxngitix kx drtwr lc vzxpmz mz Mqngrkxtr.

## 8

### *Nzmukr Kxnzrlxngiting Dakxnzng Kx Nzkabz Mz Mqngr Drka' Kxnzlx*

<sup>1</sup> Rlxti-kzpa'mu bange kx nzmu takitrde kxnzrlxngiting nzmukr-krdr dakxnzng kx ngi blz nzkabz mz mqngr drka' kxnzlx. Rpiamu kx Mqngrkxtr kamle bagu nzrkrlzng amrlx kx takitrde nznq-krule. A' nzrkrlz-krmu lc krlzle nzbatr-krbzle nzglqpx-lzbq-krmu, nzmukr trnamrlzti-kzwamuu kztemung kxnzrlxngiting. Murde nivz lc dekr

---

† **7:38** Mz natq lr Grik ngalrde lcnq 36-38 mwz drtwr ngrdr li. Kzdq drtwr ngrde nzyrope. X kzdq kz drtwr ngrde nide sele: *36 Rlxti-kzpa'mu bange nzymnetr-krnge mz ncblo kx nzipelr mz kzdq olvi nzyrlz-krdr; a' tekqtr-moule drtwrde murde mz drtwrde abrtzlvz zlwz Gct trnzyrlz-ngru. A' mzli ka tekqtr-moule drtwrde, murde mz drtwrde trtubqzuz mz olvi lc x mou rblxbz bade nzxplrlvz-krde nrkrdrdqde. Mrlz nzvz-nqblq-krde me pnz drtwrde. Nzyrlz-krdr trngiu alwx. 37 A' nzmukr drtwr ncblo lc natu-amqngile kx mrlz trnzyrlz-krdeu, x trpnz-moungr da kx aelwapx-ngrde kx takitrde nzyrlz-krde, e ncblo lc trvz-rbruz mz nzvz-nqblq-krde me pnz drtwrde. 38 Mrlz nzyrlz-krde o trnzyrlz-krdeu. A' mz drtwrnge, mrlz trnzyrlz-krdr, murde mzli ka mzli r nzatrkatizlwzng kxnzrlxngiting.*

tqaxplrle nzrlxngitikir lrmakxtr x nzesz'tikir drtwrdr.

<sup>2</sup> Leplz kcng tzrpilr kx nzkrly-angidrlr da amrlx, trnzkrlylru da kx myapxbz mz nzrkrlyngr.

<sup>3</sup> A' mz krkcng tzmrlztilr Gct, sc tqrpile kx nidr doa nedeng. X leplz lcng tzmrlzti-kzlr kztedrng x nzrkrly-krdr tubq.

<sup>4</sup> X mrlz nzaotikir drtwrmu nzalvztrngr lc mz nzmungr dakxnzng kxnzkabz mz mqngr drka' kxnzly. Murde krlzku kx trpnz-moungr gct, a' ngi txpwz Gct angidr kc esz'txu.

<sup>5</sup> Leplz nzangioler mqngr x drka' kxnzkqlung kxmule-esz' kxnzmneng mzlilxlr o mrka mz nrly, mz nzrpi-krdr kx nidr gct rdrng x kxnzetu rdrng.

<sup>6</sup> A' krlzku kx Gct esz'txu, Trtegu kc tqwztrpzku bade x nou leplz x da amrlx. X Kxetu esz'txu, Jiszs Kxnzmcpz, kc tqwz-ngrde leplz x da amrlx x tqkamle bagu nzlungr mz nzaxvctr-krbzku bade.

<sup>7</sup> A' kxnzrlxngiting amrlx trnzkrlylru nzalvztrngr angidr lcng. Murde mzli kc kzdung nidr nzangioler mqngr drka' lcng tzlz. X mz drtwrdr nzaleng alwx mzli ka mz nzmukrdr dakxnzng kx ngi blz kx nzkabz mz mqngr drka' kxnzly. X myapengr drtqdr nzvz-rbr-krdr lc.

<sup>8</sup> Nakrlzku kx nzmungr o trnzmu-ngru trtekqrleu nzmnc-zpwx-krgr badr Gct.

<sup>9</sup> A' mz nivz, aclvetio-lzbqamu, murde nzalekrmu da kxtubqzbz mz drtwrmu ma tqataole mz alwx kztemung kx nzrlxngiti-krdr ngrgobe.

<sup>10</sup> Bzkq kztem lc mcpzle nzmukrm da mz madrka', murde ma tqngi-batrpzle bade nzalekrde da kx rpi drtwrde ngi alwx.

<sup>11</sup> Zbz sc tqatrkatipeq nzrlxngitigr mzlem lc tqrlapx mz nzbzkr Kraes, murde aleq da kx-tubqbz mz drtwrm.

<sup>12</sup> Alwx nrgm, mz nzatrkatikrm nzrlxngitigr kztem kc tqalele da kx rpi drtwrde ngi alwx, ngi kz alwx ngr nzatrkatikrm Kraes.

<sup>13</sup> Mz nzmukrde lcde, trpengr nzmukrnge dakxnzng knike na-ataole kztenge mz alwx, murde ma tqatrkatiq nzrlxngitigrkrde.

## 9

### *Aposol Pol Nzaotigr Drtwrde Le Kztedeng Nzmyaszpxlr Nide \**

<sup>1</sup> Takitrde nztwzkrnge x nzalekrnge da kxkqlu, a' mzli kang kqlu axtxngrboleng mz nzokatrkrnge kztengeng. Kxmuleesz' kzdung nimu nzpxngrdr nzmnczkrmlr mz zmatq rnge, a' ni-kznge aposol, mz nzmckrnge Kxetu rgu Jiszs, kc tqadcpz-lzbqm bange. X nznginikrmu kxnzrlxngiting vzpxm mz nzvz-nqblqkrnge nzwzngr kc tqaprcmle bange.

<sup>2</sup> Kxmuleesz' kzdu-kzng leplz nzpxtpxngrdr nznginikrnge aposol, a' nimu kx nzrkrlzng kx ninge aposol kc tqmnczlbzmu mz zmatq ngrde,

---

\* **9:** Pol naycmnetr-mou-ngrde nzmungr dakxnzng kx nzkabz mz mqngr drka' kxnzlz kc tqpi-kaile mz dckrlzde kc 8. A' mz dckrlzde kc 9, rpile kx navz-nqblqlr lrpzki rde mz nzaotigr drtwrde kx kztedeng nzmyaszpxlr nide. X kxmuleesz' kzdung nidr nzrpilr kx trnginideu aposol angidr, a' aelwapx-kz-ngrbzle badr kx nide aposol angidr. Zbz mz dckrlzde kc 10 ycmnetr-mou-ngrde mz dakxnzng kx nzkabz mz mqngr drka' kxnzlz.

murde abrtprzmu drtwrmu mz Jiszs mzli kc tqyapwxtipxbo Nrpakxmrlz bamu.

<sup>3</sup> Mzli lc tqmnc-ngrbo bamu, tr-rlr-ngrpou bamu nzaclve-krmu ninge mz nzrka-krmamu da bange. Dekc kzdung nimu tZRpi-ngrdr kx trnginingeu aposol angidr.

<sup>4</sup> Dazpwxtx kx takitrde leplz kcng tzlalztqzbzng mz aposol nzrka-krbzlr bade dakxnzng.

<sup>5</sup> Pita badr kzdu-kzng aposol, x mzleng Kxetu Jiszs nzvzminedr olvz rdrng mz nzayo-krdr mz nzwz-krdr x leplz nzaclvelr nidr amrlx. X takitrde kz nzaclve-krmu nigr badr olvz ngrdr kztengeng kcng tqvzminekr mz nzwz-krgr.

<sup>6</sup> Bzkq rpi drtwrmu kx mrlz nigr ncdR Banabas nzwz-krgr mz nzrtwz-krgr trau, mzli lcpwz tqaclve-ngrnamu kxnzetu kc-kzng.

<sup>7</sup> Murde opx angidr kx takitrde nzxpengr ncblo mz nzwz-krde. Ncblo ngr vea nzxpeng mz nzwz-krdr mz ami. X ncblo kx wz mz nrlanc ngq-kzle kzdung dalr nrlanc. X ncblo kxacive sip, mnq-kzle lue lr neyr sip nedeng.

<sup>8</sup> X mz natqnge lcng trvz-nqblqtxpou drtwr ncblo mz nrlc ka, a' Loukxtr pi-kzle da lc,

<sup>9</sup> mz nZRpi-krde kx, *"Bzkq pebzmu nao kzu, a' rlr-ngrbz bade nZmu-krde mzli kc tqrnzltqtipx-ngrde nra wit."* ✧ ?Myx kxmule, rpiamu kx Gct ycmnetr-ngrpwzle kzu? Trtingr!

<sup>10</sup> Murde krlc tqycmnetr-kz-ngrde nigu. Doa kc tqpe rtq x doa kc tqrkq nrade mz nzbrpe-krde, mz drtwrdr natwz-kzlr kzdung dakxnzng ngrde. Da kc tqwai-kzle mz nigr, mz leplz kcng tqaclvekr.

---

✧ 9:9 Lou Kcpwz 25:4



11 Takitrde nzrka-krmamu bagr kzdung da kxpi pz kx naokatrle nrkrdrtqgr mz nrlc ka, murde rlrpx-lzbq-ngrgr kx naprtr-kzamu mz da kxmrlzting kx nayc-alo mz nrlc kc navzm.

12 Mrlz nzokatr-krmu leplz kc-kzng tzalvztrlr nimu. A' mz nzngini-krnge aposol ngrmu, zmatq rnge namyaszpxle zmatq ngrdr. X takitrde nigr badr kztengeng mz nzwzkr Kxetu nzrka-krmamu da bagr.

A' aoti drtwrgr kx bzkq wzkr mz zmatq lc mz nzrlx-krbzkr da bamu, kxmule-esz' da amrlx rblxm bagr, murde ma tqrpwa'-ngrne Nrpa ngr Kraes, mz nzrpikr leplz kx alvztr-ngrne nimu nztwz-nrbalq-krnge dakxnzng.

13 X takitrde nzokatr-krmu nigr mz dakxnzng mz nzvz-nqblq-krmu pris kxnzwpzxmng mz Mangr-nzangiongr Yawe. Murde nzrtwzng dakxnzng kx nzrlr-ngrbz mz Mangr-nzangiongr x ncblo kxnzkabzlr animol kx ngi blz mz olta, nzrtwz-kzng kzdung drte mz blz lc.

14 X Kxetu Jiszs esz'-krde kapx-kzle natq kx leplz kcng tzxlrlr Nrpakxmrlz takitrde nzrka-krbzlr dakxnzng mz leplz kcng tzyapwxtipxbzlr nrpa lc badr. ✧

15 Mz nzm-krde lcde, kxmule-esz' takitrde nzrka-krmamu dakxnzng bange mz nzngini-krnge aposol, a' trtwzwxu dakxnzng lcng. A' tryr-ngrpou da lcng murde natwzx du da kx nangi sng m z naclvle-krmu ninge. Glqpx-lzbq-ngrne trnzrtwz-krngeu da scdr leplz mz nzyapwxtipx-krbo Nrpakxmrlz badr. X mrlzvxitx nzbztr-

---

✧ 9:14 Matiu 10:10; Luk 10:7; Galesia 6:6; 1 Timoti 5:18

krnge mz kzdq da, ma tZRpi leplz kx pokia-ngrne nZglqpx-lzbq-krnge lc.

<sup>16</sup> Murde nZglqpx-lzbq-krnge lc trvzpxpuu mz nzyapwxtipx-krnge Nrpakxmrlz, a' murde Gct kapxle natq mz nzyapwxtipx-krngele. X trmr-lzpuu bange nZmu trnavz-nqblqwxu le.

<sup>17</sup> NZmu natwzx nzwzngR lc esz'-krnge, takitrde nZxpengR ninge. A' apux kxnzawz-nrbalq ne Gct kc tqaprcmle nzwzngR lc bange. X kxnzawz-nrbalq trnzxpeu mz nzale-krde nzwz-krde.

<sup>18</sup> Ninge kxnzawz-nrbalq ne Gct x tr-rtwzwxu da mz nzale-krnge nzwzngR kc tqaprcm Gct bange. X mz mzli lcpwz ni-kznge aposol ngrmu x takitrde nzrtwz-krnge da murde okatrx nimu. Kxmule-esz', a' rpwa'-ngrbo bamu nZrka-krmamu da bange, murde suti drtwrnge kx Gct na-abrtzlvzle ninge.

<sup>19</sup> Mz nZmu-krde lcde, trpnzngR doa kx mn-clzbo mz zmatq ngrde. A' avzo-lzbqx mz nzwztr-krbo mz leplz amrlx, murde navectrpwc' leplz mz Kraes.

<sup>20</sup> Mz nzwz-krgr badr lr Jiu, kxmule-esz' trm-nclzpepou mz Lou sc Mosis, a' vz-nqblqx nqmQ krgrng, murde navectrpwc' mZlengeng lcng mz Kraes.

<sup>21</sup> X mz nzwz-krgr badr nimu kcng trngiulrJiu kxtrnzkrzlzru Lou sc Mosis, vz-nqblqx nqmQ krmung. X trvz-nqblqwxu nqmQ krgrng mz dakxnzng x mz nZrwztingR da. A' vz-nqblq-zvzx da kxtubq mz drtwr Gct, murde mnclzbo mz Kraes.

<sup>22</sup> Mz nZmnc-krgr badr leplz kcng nZrlxngiti-

krdr ngrgo, apu-kzx doa kx nzrlxngiti-krde ngrgo, murde ma tqatrkatix nzrlxngiti-krdr, a' na-axplrx nidr. Mz nzm-krde lcde, mnc-nqblqx nqm q krdr leplz kang kqlu, murde navectrpwc' kzdung nidr mz Kraes.

<sup>23</sup> Sa na-ale-zvzx da amrlx mz nzlepx-krnge Nrpakxmrlz mz leplz kxnzkqlung. Murde suti drtwrnge nzprtr-kz-krpo badr mz da kxmrlzting kcng tqkabz Gct mz krkcng tzrlxngiting.

<sup>24</sup> Mz nzmnc-krge mz nrlc ka apuku leplz kcng tzvong mz nzesangr. A' leplz kcng tzaovxiong txpwz kx nztwzlr dakxmrlz mz nzayrkrpx-krdr nzesangr lc. Mz nzm-krde lcde, da amrlx kx aleamu mz nzmnc-krmu naokatrle nimu mz nzayrkrpx-krmu nzesangr lc, murde natwz-kzamu nzlungr kxboi.

<sup>25</sup> Leplz kznikeng nasuti drtwrdr nzvz-krdr mz sport mz Olimpik, navz zvz nzaycnglrli-krdr nrkrdrdqdr mz nzaxplr-krdrleng. Murde natwzlr kraon ngr leu kx ani txpwz nzblo-krde, x mzli r nzrglqpxngr nidr trboiu. A' mz nzvo-krge mz nzesangr lc, abz-zlwzku nztwz-krge da kxmrlz kx naye-alo mz nzprtr-krge me matq ngr Gct Heven.

<sup>26</sup> Krlc nqm q krnge mz nzmnc-krnge. Murde natwz-kzx da kxmrlz kx nakabz Gct mz leplz kcng tzaovxiong. Apux ncblo kx vo mz nzesangr, mz nzvo-ani-krnge x nzaotikr drtwrnge mrkc tqesakingr nzesangr lc. X apu-kzx ncblo kx eta mz sport. A' tr-eta-abeanewxu.

<sup>27</sup> Apusr-ngrne nrkrdrdqnge kxnzawz-nrbalq nenge, mz nzlolvzo-krngele x mz nzrtulrtr-krbo nzvz-nqblq-krde me pnz drtwrnge. Murde ma

tqrngidrlvz-ngrbo mz leplz nzlolvzo-krdr nidr esz'-krdr, a' pxtpx-ngrde ninge Gct kalr mz trnzvz-nqblq-krngeu natqngeng.

## 10

### *Kxnmung Mz Madrka' Nzangioldr Kxtrngiu Gct Angidr*

<sup>1</sup> Nadcpz zvz mz drtwrmu nzpxtpxkr Gct leplz nedeng mzli kc bqnc. Murde mzli kc lr Israel tzrlasz-ngrdr Ijpt nzmnczbzng mz nza-clvekr Gct nidr. X yrlqle dcbz kx apule nctrpou kxwzpx nangi rrx ngr nzmnc-krbzle badr. X arlapxle nidr mz ami ngr lr Ijpt, mz nzakipx-krde Prla Bla, mz nzkawi-krdrle mz nanycdr. ✧

<sup>2</sup> Mz nqmqlcpwz tqarlapxngr Jiszs nigu x axvc-trpzku bade mz nzwrkxtrngr, lr Israel nzaxvctr-kzpzng mz Mosis kc tqmailzle nidr mz nzl-lapxngr. Nzkawi-krdr Prla Bla x nzmncz-krbzlr mz dcbz ngi kzdq namrlzu r nzwrkxtrngr.

<sup>3-4</sup> X mz nqmqlcpwz tqmu-ngrgu x tqrmnq-ngrgu da kx vzpxm mz zmatq ngr Gct mz Nzmungrkxtr mzli ka, leplz lcng mzli kc nzmung dakxnzng x nzmngng lue kc tqkabz Gct badr mz zmatq ngrde. Rplz kxetu kc tqyrlepx-ngrm lue ngi rrx ngr nzmnc-krbz Kraes badr mz nzokatr-krde nidr, da kc tqwai-kzple bagu mzli ka. ✧

<sup>5</sup> A' nadcpz mz drtwrmu kx kxmule-esz' Gct arlapxpele nidr x amrlzle nidr x okatr-zvzle nidr,

---

✧ **10:1** Nzrlaszngr 13:17—14:31 ✧ **10:3-4** Nzrlaszngr 16:4-30; 17:1-7; Nzqqlu-krdr 20:2-13; Lou Kcpwz 8:15-16; 32:4, 15, 18, 30-31; Nemaea 9:15, 20; Sam 78:15-31; 105:40-41

a' ngyati zlwz drtwrde krkcng tzangioldr kxtrngiu Gct angidr. X odatile nidr mrkc lzke. ✧

<sup>6</sup> Da lcng nzyrong mz nzrngidrlvz-krmleng bagu, murde bzkq prtrpzku badr mz nzayrplapxng kcpwz. Bzkq sutitx zlwz drtwrgu da kxdrka'ngr da kc tzwaillr, murde ma tzayrplapx-alongr nigu.

<sup>7</sup> Nzryrngkxtr rpile kx, *“Leplz lcng tzangioldr mqngr nei kzu kxnzlw mz nzmu-krbzlr bade x nzalalvzlr nide.”* ✧ Bzkq mutrpzku mz mqngr drka' kxnzlw da kc tzwai kzdung nidr, murde ma tqangio-kzku kxtrngiu Gct angidr.

<sup>8</sup> X bzkq rmwimiku kxtrngiu krnalzgu, da kc tzwai kzdung nidr. Murde mzli lc leplz siu-nzpnli-nrade-tq (23,000) nzbz-krdr kxesz'. ✧

<sup>9</sup> X bzkq matitr drtwrgu zmrlz ngr Kxetu rgu mz nzmcti-krgru kx na-ayrplapxle nigu o trtingr, da kc tzwai kzdung nidr. Murde ma tqodati-kzle nigu da kc tqwaile mz lr Israel kcng tzbzting mz nzmakxkr ningidoe nidr. ✧

<sup>10</sup> X bzkq apuamu kzdung nidr kcng drtwrdr tqcltrpz mz Mosis, mz nzlctr-krm drtwrmu bange. Murde enjrl kc tqatwzlr-ngrbz Gct nibqtile nidr. ✧

<sup>11</sup> Da lcng tqprtztibzng badr nzrngidrlvz-ngrm bagu kx bzkq xpqbrlr-ngrgu Gct. X nzyro-kzng mz nzokatr-krdr nigu kcng tqmncpeku mz mzli r nzangidatipekr Gct drtwr kc tqyrlq-pnzle mz nzarlapxkr Kraes leplz.

---

✧ **10:5** Nzrlaszng 32; Nzqqlu-krdr 14 ✧ **10:7** Nzrlaszng 32:6

✧ **10:8** Nzqqlu-krdr 25:1-9 ✧ **10:9** Nzqqlu-krdr 21:4-7 ✧ **10:10** Nzqqlu-krdr 16:41-50

<sup>12</sup> Mz nzmukrde lcde, doa kx rpil kx tuamqngipe mz nzrlxngiti-krde x rblxbz bade nztao-krde mz da lcng, na-aclvetio-lzbq. Trmrlzu nztao-krde mz nzangio-krde kxtrngiu Gct angidr x dekc trnaprtrpe-ngrdeu mz nzlungr kxboi.

<sup>13</sup> Nzatalzngr amrlx kcng tzprtzbzng bam, nzprt-zkzpng mz leplz amrlx. A' mrlz nzabrtrkrbzme drtwrm mz Gct, kc tqokatr-zvzle nim. Murde sa na-aelwapx-ngrbzle bam lrpzki r nzyrbqpx-krm. X mz nzo-zli-krmle, sa natuamqngiq, x nzatalzngr trpnzng nzaovxio-krde nim.

<sup>14</sup> Mz nzmukrde lcde, kx mzlengeng x inwengeng, yrlqpx-lzbq-zvzamu mz nzangio-krmu mqngr drka' kxnz lz murde trngiu Gct angidr.

<sup>15</sup> X mz nznngini-krmu leplz kxnzyrplapxng, nakrlz-angidramu kx natq kc napibo bamu tubq.

<sup>16</sup> Mz Nzmungrkxtr, mzli kc tqrmnqo-ngrgu mz kap ngr waen kc tqawi-ngrbzku mz Gct, x tqmungrgu bret kc tzlopwxi, prtrku mz da kxmrlzting kcng tzvzpxmqng mz nzyrleo-krm mepyr ngr Kraes x nzbzo-krmle mz kros.

<sup>17</sup> Bret esz'txu, x nigu amrlx nrkrdrdq esz', murde prtr-ngrgu bret kc esz'. X bret lc esz' ngi rkx ngr nrkrdrdq Jisz, kc tqodutr-lxblr-ngrbzku bade mz Nzmungrkxtr.

<sup>18</sup> Na-aoti kz drtwrmu lr Israel. Murde mzli kc tznq-ngrdr dq animol kc tqngi blz, opx angidr kx nzodutr-lxblrbzng mz Gct kcpwz tzkabzlr bade blz kc.

<sup>19-20</sup> A' kxtrnzrlxngitiung nzkabzlr blz krdr mz mqngr drka' kxnz lz nedrng, a' trngiu mz Gct angidr. Kxmule-esz' mqngr drka' kxnz lz nedr

trnzluung x blz krdr maneng, a' trsutiu drtwrnge nzodutr-lxblr-krbzmu mz drka' lcng.

<sup>21</sup> Murde Gct tr-rlr-ngrpwzleu nzrmngo-krmu mz kap sc Kraes, x mz nibrde krsc kz drka'. X tr-rlr-kz-ngrpwzleu nzmukrmu bret kxtr, x mz nibrde dakxnzng kx nzkabz mz drka'.

<sup>22</sup> Bzkq aleamu da kxmule lcng, murde ma Gct tqngyati drtwrde nimu mz nzangio-krmu gct kx trngiu Yawe esz'-krde, x sc tqayrplapx-zlwzpele nimu.

<sup>23</sup> Kzdung nimu nzrpilr kx, "Nzrlr-ngrm bange nzale-krnge da kx suti drtwrnge, murde trmn-clzpepou mz zmatq ngr Lou sc Mosis." A' napibo bamu kx, "Kzdung da kx aleamu trnzokatrllu kztemung mz nzesz'tikr drtwrmu x mz nzaetunepxngr nzrlxngiti-krdr." ✧

<sup>24</sup> Bzkq aoti tpxwz drtwrmu nimu esz'-krmu, a' na-aoti kz drtwrmu da kx naokatrle kztemung. ✧

<sup>25</sup> Takitrde nzmukrmu animol kznike rmctiamu me nzamwangr da. A' bzkq yc mz drtwrmu nzveati-krbzmu kx nzkabz mz mqngr drka' kxnz lz o trtingr.

<sup>26</sup> Da kc tqwai nzpikr Nzryrngrkxtr le kx, "*Nrlc atwrnrngr nyz Yawe, x doa amrlx mz nrlc nedeng x da amrlx mz nrlc scdeng.*" ✧ Mz nzmukrde lcde, Gct rlr-ngrbzle bamu nzmukrmu dakxnzng amrlx, mz nzawi-krbzmu bade mz da lcng.

<sup>27</sup> Nzmu kzdq ncblo kxtr-rlxngitiu na-aveatimle nim mz nzmukrmu badr ma nyzde, vzbz ye x ngq da kznikeng katibzle bam. X

bzkq yc mz drtwrm nzveati-krbzme dakxnzng kx kabzleng kx nzkabz mz drka' o trtingr.

<sup>28-29</sup> A' nzmu kzdq kcng doa rpibzle bam kx, "Dakxnzng lc nzkabz mz drka'," bzkq ngqn dakxnzng lcde, murde ma tqatrkatiq nabz doa kc tqkxmu nzymne-krbzle lc bam.

<sup>30</sup> Murde kxmule-esz' tratrkatileu nabzngc mz nzmu-krnge dakxnzng lc tqawi-ngrbo mz Gct, a' na-aoti kz drtwrncge leplz kcng tzipilr mz nabzdr kx vz-rbrx mz nzngq-krngele.

<sup>31</sup> X na-amrlueku Gct mz da amrlx kx aleku, kxmule-esz' muku o rmnqku.

<sup>32</sup> Bzkq atrkatiamu drtwr lr Jiu o kxtrnzrlxn-gitiung, murde ma tzipxpx-ngrdr Nrpakxmrz. X bzkq atrkati-kzamu drtwr kztemung lrmakxtr kxnzrlxngiting.

<sup>33</sup> Da kc tqwai-zvzx mz nzabz-zlwx-krnge kx leplz amrlx na-abrtzlvzlr ninge mz da kcng amrlx tqalexng. Tralwxu da kx mrlzm bange, a' ale-zvzx da kx naokatrle leplz kxnzkqlung murde narlapxng mz nzlxngiti-krdr Jisz.

## 11

<sup>1</sup> Mz nzmu-krde lcde, vz-nqblqamu nqm q krnge mz da lc, da kc tqwaix mz nzvz-nqblq-krnge nqm q kr Kraes.

### *Nqm q Krgu Kx Takitrde Olvz Ngr Lrmakxtr*

<sup>2</sup> Rpiamu mz letz scmu kx dcp x mz drtwrmu nqm q krnge x da amrlx kcng tqalvztr-ngrne nimu. X rpi-kzamu kx vz-nqblq-zvzamu nqm q ngr nzangiongr mz makxtr kcng tqaprcho bamu. X abrtzlvzx nimu mz da lcng.



<sup>3</sup> A' navz-nqblq-kzamu da kc tqpiho bamu kx bzkq atrkatiamu drtwr kztemung kxnzrlxngiting. Mzli kc tqyrlwr-lxblr-ngrnamu mz nzangiongr, nar olvz na-akqlvzlr mz nzvz-nqblq-krde nqmq krgu mzli ka, mz nzkrka'-kato-krdr x mz nzrplzpx-krdr nrpa kx kabz Mqngrkxtr badr. Nakrlz-angidramu kx ncblo amrlx kxnzrlxngiting nzmnczlbzng mz Kraes. X olvz nzmnczlbzng mz ncblo, murde olvz kc ayrnrngr nzwzng m nrvr ngr blrir Adzm. X Kraes mnczlbz mz Gct. Mz nzmu-krde lcde, mz nzvz-nqblq-krde nqmq krgu mz nzangiongr, ncblo x olvz bletipxng.

<sup>4-10</sup> X mz nzangiongr lc, trtakitrdeu ncblo nzakqlvz-krde narde, murde Gct wz-kai-ngrde ncblo mz mqngrde, murde na-amatqlr nide. Dekc ncblo kx akqlvzle narde mz nzangiongr, amanede Kraes kc tqngi nou nzlu-krde. Mz nzwzkr Gct leplz, ncblo x olvz bletipxng. Murde Adzm trvzpxpuu mz Iv, a' Iv vzpxm mz Adzm. X Gct trwz-ngrdeu Adzm mz nzokatr-krde Iv, a' wz-ngrde Iv mz nzokatr-krde Adzm, murde olvz na-amatqlr ncblo. Dekc olvz kx trakqlvzleu narde mz nzangiongr, amatinede ncblo kxnzrlxngiting, mz nzrtulrtr-krde nzrsakrlr-krdr badr ncblo. X nzmyakr drtq olvz kxmule lc, esz' ncd r olvz kx nqngi narde nzyrlxo x olvz kx nqngi narde nzrpakingr apule ncblo. Delc, mrlz olvz nzakqlvz-krdr nardr mz nzangiongr, nangi rkx ngr nzmncz-krbzlr mz zmatq kxtubq, murde enjrl na-abrtzlvz-kzlr nidr.

<sup>11</sup> Kxmule-esz', a' mz nzaxvctrpe-krbzku lc mz Kxetu, olvz nzmnc-xglelr ncblo, x ncblo nzmnc-xgle-kzlr olvz.

<sup>12</sup> Kxmule-esz' Iv vzpx-kaip mz Adzm, a' abzo mzli lc ncblo nzvzpxmqng mz olvz. Drtwr ngrde kx leplz amrlx nzrsakrlrng mz nzmnc lz-krbzlr mz Gct kc tqwz-ngrde nigu.

<sup>13</sup> Mwx elx mzli ka drtwrmu esz'ti mz nzrpi-krnge kx nar olvz na-akqlvzlr mz nzkrka'-kato-krdr x mz nzrplzpx-krdr nrpa kx kabz Mqn-grkxtr badr.

<sup>14</sup> X mz drtwrgu, trtakitrdeu ncblo nqngi nardr nzboi-krdr, murde mz nqm q krgu ngi da kx myangr drtqdr.

<sup>15</sup> A' rpiku kx mrlz nzboikr nqngi nar olvz, murde lqngipx mz nzobq-krqu. X opxm kx Gct kabzle nqngi nardr nangi dalr nzakqlvz-krde nardr. Delc takitrde nzakqlvz-krdr nardr da kc tqwai nzipix-krbole bamu.

<sup>16</sup> Bzqk kxvecpx-lzbqm mz da lc, murde alvztr-ngrne nqm q lc mzli kc tqmnc-ngrbo bamu, x dzbe lrmakxtr amrlx neng Gct nzvz-nqblq-kzlr.  
\*

### *Da Kx Akipxe Kxnzrlxngiting Mz Nzmungrkxtr*

---

\* **11:16** 11:2 Pol ycmnetr-ngrde nqm q krdr mzli lc, a' trngiu natq kx rngidrlvz-ngrmle kx navz-nqblqku mzli ka. 11:3 Mz drtwr Gct x mrkc Heven leplz amrlx nzrsakrlrng, murde wz-ngrde nidr amrlx mz mqngrde. 11:4-10 Mzli lc mz nqm q krdr ngi da kx myangr drtq olvz kx nqngi narde kxnmusr-ngdr lcng. Trkrlzkuu drtwr angidr ngr natq Pol mz nzrpi-krde kx, 'murde enjrl.' A' nzrtekqtr-krgr vz-nqblqle kzdq drtwr kxnzrlxng. 11:16 Drtc' amrlx kcng tzmnc lzbnzng mz zmatq ngr King r Rom, lrmakxtr kcng mrlcde tzvz-nqblqlr nqm q lc. A' trngiu drtwr ngrde kx navz-nqblqku mzli ka mrka mz trmctu nyzgu.

17 Trabrtzlvzwxu nimu kxmu nzvz-nqblq-krmu kzdung nqm̄q ngr makxtr kcng tqaprcbo bamu, myapxbz mz nqm̄q krmu mz Nz-mungrkxtr kx atrkatile kzdung kztemung.

18 Xlr̄x kx nimu lrmakxtr akipx-lzbqmu mz dzbedeng mzli kc tqyrlwr-lxblr-ngrnamu mz nzangiongr. X lxngitix kxpipz kx nrpa lc ngi da angidr.

19 A' krlz-kzx kx kzdung nzakipxngr lcng nzvzpxmqng mz nztu-amqngikr kzdung nimu mz da kxtubq, murde ma tqprtrpzmu mz kxnzvrbrng, a' nakrlzngr neke tubq mz nzobqkr Gct.

20 Kxmule-esz', a' mzli kc tqyrlwr-lxblr-ngrnamu mz nzm̄lvzngr Kxetu rgu, nqm̄q krmu atrkatile nide, mz nzakipx-lzbq-krmu. X apusr-ngrnamule trngiu Nz-mungrkxtr. †

21 Murde kxmule-esz' yrlwr-lxblramu, a' leplz amrlx trnzakilru dakxnzng nadr badr kztedrng. A' kc doa ngq-tpwzle dakxnzng nade. X mzli lc nimu kxnzngi bcnyrng nzm̄u-zpwxng x nzm̄nq-zlwzng waen, a' leplz kx trpnzngr scdr da nzbrtaleng.

22 Bzkq aleamu da lc. A' mu-kaiamu mz ma

---

† 11:20 Mzli lc pnz, leplz amrlx mrlc nzakipx-lzbqng mz dzbede nzling, dzbede kx nznginidr bcnyr x dzbede kx trpnzngr scdr da. Mz nqm̄q krdr, mzli kc leplz tzvz-ngrmlr mz ma nyz kzdq bcnyr, bcnyr lc badr kztedeng nzmung me esz' mz dakxnzng kx mrlzvx̄i kxkqlu. A' leplz kx trpnzngr scdr da, nzmung me kzble mz ma nyzde, x dakxnzng nadr pipz. X mrkc tzwxbu-ngrdr nzkr̄lzlr nzm̄cngr leplz kx nzm̄u-zpwxng. Mz letz lc, Pol ngyangr drtwrde murde kxnzrlxngiting kx nzngi bcnyrng nzvz-nqblqlr nqm̄q lcpwz mz nzyrlwr-lxblrkr kxnzrlxngiting ma nyzdr mz nzangiongr x mz nzprtr-krdr mz Nz-mungrkxtr.

nzymung, x mz nibrde sc tqyrlwr-lxblr-ateamu badr kztemung kxnzrlxngiting. Murde amyati-bzmu drtq leplz kcng tzbrtaleng mz nzobqszo-krmu lrmakxtr neng Gct. ?Nike napibo bamu? ? Mrlz nzglqlz-krnge nimu mz da lc? Trtingr!

<sup>23</sup> A' nqm̄q kc tqkam Kxetu bange x aprcpebo bamu nide sele. Jiszs, mz nrlckxbq ngr zbq kc tqamwangr Judzs nide, kalzmlē bret.

<sup>24</sup> Awi-ngrbzle mz Gct, lopxile, x rpibzle mz ncblo nedeng kx, “Krlc ncvr nrkrdr̄tq̄nge, nzkabz bamu. Rtrngzti-zvzbzmu da lc mz nzdcpxkr drtwrmu ninge.” ✨

<sup>25</sup> Mz nqm̄q lcpwz, mz nibr nzm̄lvz-krdr Nza-myangr, gl̄qlzmlē kap ngr waen, x rpibzle badr kx, “Waen lc ngi r̄kx ngr Nzesz'tikr Drtwr Gct Kc Ate tqyrl̄qbzle badr leplz mz nzyrleokr mēpyr r̄nge. Rtrngztibzmu da lc mzli kzn̄ikeng mn̄q-ngrnamule, mz nzdcpx-zvzkr drtwrmu ninge.” ‡

<sup>26</sup> Drtwr ngrde kx, mz nzngq-krmu bret lc, x nzrm̄nq-krmu waen lc, navz zvz nzaelwapx-krmu nzbzkr Kraes nigu amrlx, vz vz krlzmlē mzli kx yzlu-mou-ngrmlē.

<sup>27</sup> Mz nzm̄u-krde lcde, doa kx vz zvz nzamane-krde Kxetu mz Nzmungrkxtr, da kc tzwai kzdung nimu, atrkatilr Nzesz'tikr Drtwrdr badr Gct kc

---

✨ **11:24** Asaea 53:12; Matiū 26:29; Mak 14:22-25; Luk 22:14-20

‡ **11:25** Nzmungrkxtr ngi r̄kx ngr nzpr̄tr̄ngr mz da kxm̄rlzting kcng tzvzpxm̄qng mz Nzesz'tikr Drtwr lc Tqmrna. Krlcde seleng—nz̄ipq̄pxngr alwx, nzamrlznḡr nrkrdr̄tq̄ mz zyagox, nzrlxngitingr kx xplr, nzesz'tikr drtwr kxnzrlxngiting, nzatubqtikr Jiszs nidr mz nzobqkr Gct, x kzdu-kzng da kxnzmulr lcng. [Jeremaea 31:31-34; Nzrlasznḡr 24:8]

tqyrlqle mz nrkrdrdq Mrlxde mz nzyrleo-krm mepyr ngrde.

<sup>28</sup> Dekc, na-aoti-angidr-kaingr drtwrmu nqm̄q krmu mz Nzmungrkxtr. X sc tqmupeamu bret x tqr̄mn̄qpeamu waen ngr̄deng kc ate, murde ma tqatrkatiamu kztemung mz nqm̄q krmu.

<sup>29</sup> Murde Gct sa na-ayrplapxle doa kznike prtr mz Nzmungrkxtr, a' vz-rbr murde trkr̄lzleu drtwr ngr nrkrdrdq Kxnm̄cpx. ✧

<sup>30</sup> Dekc kxnzkqlung mz nimu tzyangrngape-ngrdr x tzyagoxpe-ngrdr. X kzdung nimu tzbzpe-ngrdr. §

<sup>31</sup> A' naobqtr-kaiku mz nabzgu, mz nzm̄nclz-krbzku mz me pnz drtwr Kxnm̄cpx, murde ma tqprtrku mz nzayrplapx-alokr Gct nigu.

<sup>32</sup> A' mzli kc tqmc-ngrde kx vz-rbrku mz nqm̄q krgu, ayrplapxle nigu, murde natekqtrku nqm̄q nr drtwrgu x trpnzngr nzayrplapx-alo-krde nigu mz Hxl.

<sup>33</sup> Mz nzm̄u-krde lcde, kx mzlengeng x in-wengeng, mzli kc tqyrlwr-lxblr-ngrnamu mz Nzmungrkxtr lc, aodu-lzbqamu mz nivz.

<sup>34</sup> Doa kx suti drtwrde nelzde nakrlc angidr, namu pnz kai ma nyzde, murde ma tqbatrpzle nzayrplapxkr Gct nimu mz nzvz-rbr-krmu mz Nzmungrkxtr.

Mzli kc navz-ngrmc, sa napi-zpwx-mopwo du da, mz nzayzlu-krbo nike piamu mz letz scmu.

---

✧ **11:29** 1 Korint 10:17 § **11:30** 11:29 Murde kxnzrlxngiting amrlx kxnzmulr esz' mz nzobq-krde, mz nzngini-krdr nrkrdrdqde. 11:30 Trngiu drtwr ngrde kx zyagox x nzbznḡr amrlx nzvzpxmqng mz nzayrplapxkr Gct leplz.

## 12

### *Zmatq Kxmyapxbzng Kcng Tqkam Mqngrkxtr*

<sup>1</sup> Mzlangeng x inwengeng, mzli ka suti drtwrnge nzalvztr-krnge nimu mz zmatq kcng tzvzpxmqng mz Mqngrkxtr, murde nzaokrmu drtwrmu naopx.

<sup>2</sup> Krlzamu kx mzli kc tqmnc-mrbrbe-ngrnamu, drka' nzvectrplr nimu mz nzangio-krmu da kxn-zlz, kcng trnzluung.

<sup>3</sup> A' mzli ka suti drtwrnge kx nakrlzamu kxmu nzglx-krmu kxnzmncng mzlixlrl kznike kx aycmnele ncblo, kx ngi Mqngrkxtr o drka'. Murde doa kx aycmne Mqngrkxtr trtxpnzng nzrpi-krde kx, "Pibqtix Jiszs," a' ngi txpwz kx aycmne drka'. X doa kx mncpx-ngrm Mqngrkxtr, nide txpwz kx krlzle nzrpi-krde kx, "Jiszs nide Kxetu kxmyapxes'ngr."

<sup>4</sup> A' bzkq aoti txpwz drtwrmu zmatq ngr nzycmne-ngrbz mz Gct mz natq lr mrkzbleng. Murde zmatq nzkqlung kx bletipx-lxblrng kcng tzvzpxmqng mz Mqngrkxtr kcpwz esz'.

<sup>5</sup> Da kc tqwai nzwzng kxkqlu kx bletipx-lxblrng mz nzwztr-ngrbz mz Kxetu kcpwz esz'.

<sup>6</sup> X nzkrlzng kxkqlung kx bletipx-lxblrng kx nzvzpxmqng mz Gct kcpwz esz', mz nzalekr leplz nzwzng kc tqaprcbzle badr.

<sup>7</sup> A' Mqngrkxtr kamle bagu zmatq ngr nzwzng lcong tqbletipx-lxblrng, murde naokatru kztegun kxnzrlxngiting.

<sup>8</sup> X zmatq lcong tzbletipx-lxblrng tqka Mqngrkxtr nidr seleng: nzrpi-xng nrrpa ngr nzyrplapxng, nzrpi-xng nrrpa ngr nzkrlzng,

9 nzrlxngitingr kx xplr-esz'ngr, kzdung zmatqng ngr nzamrlzngr kxnzyagoxng,

10 zmatq ngr nzalengr da kxmatq, nzrplzpxngr nrpa kx kabz Gct, nzrglxngr namrlzur kxnmncng mzlilxlr kc tqwz, nzymne-ngrbz mz Gct mz natq lr mrkzbleng, x nzrpiplxngr drtwr ngr natq lr mrkzble lcngr.

11 A' Mqngrkxtr kcpwz esz' kc tqrka zmatq ngr nzwzngr lcngr tzbletipx-lxblrng. X sc tqkatipebzle mz leplz mz nzvz-nqblq-krde me pnz drtwrde.

*Naesz'tiku Mz Nrkrdrdq Kraes, Kxmule-esz' Nzwz-krngung Kqlu*

12 Nrkrdrdqm esz', a' dalr nrkrdrdq kqluti. Mz nqmq lcpwz, kxmule-esz' kqluku x zmatq ngrgu bletipx-lxblrng, a' nigu nrkrdrdq kxesz', mz nzprtr-krng mz nrkrdrdq Kraes.

13 Murde nigu amrlx nzaxvctrpzku mz nrkrdrdq lc esz', mz nzawrkxtrkr Mqngrkxtr nigu. Kxmule-esz' nigu lr Jiu o trtingr, x kxmule-esz' nigu kxnzawz-nrbalqng o trtingr, a' Gct avzomle bagu amrlx Mqngrkxtr kcpwz esz'.

14 Nrkrdrdq trngiu da kxesz'ti, a' dalr nrkrdrdq kqluting x nzwz-krdrng bletipx-lxblrng.

15 Mz nzmukrde lcde, bzkq nanyc nrkrdrdq rpil kx, "Trprtrwxu mz nrkrdrdq, murde trnipc'u mqde."

16 X bzkq nradrtq rpil kx, "Trprtrwxu mz nrkrdrdq, murde trnipc'u mzte." Murde nidr amrlx nzprtrng mz nrkrdrdq.

17 Nrkrdrdq atwrnrngr kx ngi txpwz mz, trxlru da mz nzmrbrpx-krng nradrtq. X nrkrdrdq

atwrnrngr kx ngi txpwz nradrtq, trtcngiu da mz nzmrbp-x-krm nctq.

18 Nzwznggr amrlx nzokatrllr nrkrdrdq. X Gct yrlqle kxnzrlxngiting amrlx badr zmatq ngr nzwz-krdr me namnc-ngdrdr mz nrkrdrdq Kraes, mz nzwz-nqblq-krde me pnz drtwrde.

19 Mz nznrgisckr kxnzrlxngiting amrlx zmatq kcpwz mz nzwznggr, drtwr ngrde kx nzwznggr kxnzkqlung nzmrbp-x-mqng mz nrkrdrdq Kraes. X nrkrdrdq kxmule lc, trkrlzleu nzale-krde nzwzkr nrkrdrdq amrlx.

20 Takitrde zmatq ngr nzwznggr kxnzkqlung kxbletipx-lxblrng nzwz-lxblr-krdr mz nrkrdrdq kxes'.

21 Mz nzmu-krde lcde, trtakitrdeu nar nzrpi-krbzle mz nanyc kx, "Nzwz-krm mane." X trtakitr-kzdeu mq nzrpi-krbzle mz mz kx, "Nzwz-krm mane."

22 Kxmule-esz' kzdung kxnzprtrng mz nrkrdrdq trnzxplung, a' nzwz-krdr nzmyatpx-kzng.

23 X dalr nrkrdrdqgu kx nzobqszong x kx myangr drdqgu, aclve-angidrku x amatqku nidr mz nzakqlvz-krgru nidr mz lrpz, murde nrkrdrdqgu atwrnrngr natakitrde leplz nzmc-krdrle.

24 A' dalr nrkrdrdqgu kx takitrde nzrmcnggr, trnakxmusr-ngrguu nidr lc. X kxmu-kzpwzle lc mz nrkrdrdq Kraes. Murde suti drtwr Gct kx nzamatq-krgru x nzacive-krgru krkcng tzmating namyaszpxle nzamatq-krgru kxnzamatqpeng. \*

---

\* **12:24** Mrlz nzamatq-krgru kxtrpnznggr scdr da, doa kxnztopwzng x olvz namyaszpxle kx ngi bcnyrng x kxnzeting kcng tzamatqpeng.



25 Murde trsutiu drtwr Gct kx leplz nzakipx-lzbqng, a' nzaclve-krdr kztedrng kxnzrlxngiting narsakrlrngr.

26 X mz drtwr lc, nzmz drtq kzdq doa mz nrkrdrdq Kraes naetqle, nzxngitr lxblr kztedeng amrlx. X nzmz kzdq doa nzamatqle, kztedeng amrlx naprtr-kzng mz nzabrtz-krde.

27 Nimu amrlx ngrmu nrkrdrdq Kraes. X doa kxes' mz nimu prtr mz nrkrdrdq lc x nzwz-krde myatpx kz.

28 Mz nzwzkr nzaclvengr lrmakxtr, Gct yrllq-ayrnr-ngrde nzwzkr aposol, krali nzwzkr profet, x kratq nzwzkr kxnzalvztrng mz natq Gct x mz nqm q krde.

X yrllq-kzle zmatq kxbletipx-lxblrng lcde seleng: nzalengr da kxmatq, kzdung zmatqng ngr nzamrlzng kxnzyagoxng, nzokatr-zlwzng leplz, nzmrcngr lrpzki kx navzki lrmakxtr, x nzymne-ngrbz mz Gct mz natq lr mrkzbleng.

29 Trngiu leplz amrlx kx nznginidr aposol, profet, kxnzalvztrng mz natq Gct, o kxnzaleng da kxmatq.

30 X trngiu leplz amrlx kz kxnzamrlzng kxnzyagoxng, kxnzymnebnzng mz Gct mz natq lr mrkzbleng, o kxnzrpipxng drtwr ngr natq lr mrkzble lcng.

*Nivz Namyapx-esz'ngr  
Mz Nzwztr-ngrbz Mz Gct  
Mz Zmatq Kxmyapxbzng*

<sup>31</sup> Mrlz nzsuti-zlwzkr drtwrmu zmatq kxmyapxbzng mz nzokatr-krmu lrmakxtr. A' mzli ka napibo bamu nqmq kx myapx-esz'ngr mz zmatq lcng.

## 13

<sup>1</sup> Doa kx traelwapx-ngrpwzleu nivz mz leplz, mane zmatq ngr nzymne-krde mz natq lr mrkzbleng x natq enjrl kz. Murde apule nzrli-plakr natq dram kxmznrngr mz nzrtztrngr.

<sup>2</sup> X doa kx trmrlztileu leplz, mane kz zmatq ngr nzplzpx-krde nrpa kxkabz Gct, x nzrpipx-krde nrpa ngr nzkrlzng, x nzkriz-krde da angidr kx yc-kapq. X mane kz nzxplrkr nzrlxngiti-krde kx krlzle nzabrkalz-ngrm newz.

<sup>3</sup> X doa kx traelwapx-ngrpwzleu nivz mz leplz, mane kz nzglqpx-lzbq-krde nzamwa-krde drtc' nyzdeng x dztudeng amrlx mz nzokatr-krde kx trpnzng scdr da.

<sup>4</sup> Murde doa kx aelwapx-ngrbzle nivz angidr vz-nqblqle nqmq lcde seleng: nzvz-nrwx-ngrbz mz leplz, nzrycng drtwr leplz, nzokatrng leplz, x nzavzo-lzbq-ngrbz mz leplz. A' mrlx lc bzkq glqpx-lzbqz mz leplz, bzkq kcmnz-ngrbzle dz-tudrng,

<sup>5</sup> bzkq amatinede leplz, bzkq trkibrbz mz leplz, bzkq drtwrde ngya-anibz mz leplz, x bzkq aboi drtwrde da kvz-rbrtibz leplz bade.

<sup>6</sup> Doa ngr nivz, drtwrde vz zlwz mzli kc tzalengr leplz da kxdrka'ngr, a' abrtzlvzle mzli kc tzalengr da kxtubq.

<sup>7</sup> X nivz angidr drtwr ngrde kx doa tu-zvzbz mz nibr leplz mz nzokatr-krde nidr kxmule-esz'

nqmq krdr trka. Traylzu-mopwzu da kxtrka mz da kxtrka, a' drtwrde abr-zvzle, x obqtipxle nzrtekqtrngr nqmq nr drtwr.

<sup>8</sup> Nivz trpnzngr nzyrkrpx-krde. A' zmatq amrlx ngr nzwztr-ngrbz mz Gct sa nayrkrpxng mzli kc nayzlu-ngrm Jiszs, kxmule-esz' nzplzpxngr nrpa kx kabz Gct, nzymne-ngrbz mz Gct mz natq lr mrkzbleng, x nzrpipxngr nrpa ngr nzrkrlzng.

<sup>9</sup> Murde mzli ka mz nrlc ka, rblxbz mz doa nzkrly-atwrnr-krde x nzplzpx-atwrnr-krde drtwr ngr nrpa kc tqkabz Gct bade.

<sup>10</sup> A' mzli kc nayzlu-ngrm Jiszs, sa na-atutrle da amrlx, x zmatq lcng amrlx sa namrbrng.

<sup>11</sup> Mz kzdq nzymne-ebzpxngr, mzli kc tqtopwzbe-ngrne, nzymne-krnge, nzrkrlz-krnge, x nza0-krnge drtwrnge nztakitrd dr doa kxtopwz. A' mzli ka nipenge ncblo, x yrlqtxopex nqmq krdr doa kxnztopwzng, murde nqmq krnge natakitrde ncblo.

<sup>12</sup> Mzli ka nzrmc-krngu nzalvztrngr angidr apule nzobqtr-krngu mz dzpq kx kamrbrngr. Murde trkrlz-atwrnr-ngrguu da lcng. A' Gct krlz-atwrnr-ngrde nigu. X mzli lc navzm, sa nakrlz-angidrpeku da mz nzmnc-zvz-krbzku mz Jiszs.

<sup>13</sup> Nqmq nr nabzgu tq kx nayc-along nidr seleng: nzbtrtkr drtwrgu Gct, nzobqtipx-krngu nzatutr-krde nzesalz-krdeng, x nzaelwapx-krbzku nivz lrde mz leplz. A' nivz dela tqmyapx-esz'ngr zvz.

## 14

*Gct Kabzle Zmatq Kxmyapxbzng Mz Leplz*

### *Nedeng Mz Nzaxplr-lzbq-krdr*

<sup>1</sup> Mz nzmu-krde lcde, drtqmu navq zvz mz nzmrlzti-krmu leplz. X mzli lcpwz nasuti kz drtwrmu nztwz-krmu zmatq ngr nzwztr-krbzmu mz Gct, myapxbz zmatq ngr nzrplzpxngr nrpa kx kabz Gct.

<sup>2</sup> Mzli ka suti drtwrmu kx leplz amrlx naycmnebnzng mz Gct mz natq lr mrkzbleng. A' doa kxmule lc trycmnepwzu mz lrmakxtr. Murde mqngr doa lc ycmnetr-ngrde da kx yc-kapq x leplz trnzkrzlru drtwr ngrde.

<sup>3</sup> A' mzli kc leplz nzlalztq-ngrbzlr mz doa kx plzpxle nrpa kx kabz Gct, nrpa lc axplrle nzrlxngiti-krdr, apqtrle drtwrdr, x amqtr-kzpzle drtwrdr.

<sup>4</sup> Mrlx kc tqycmnebz mz Gct mz natq lr mrkzbleng, okatrle nide esz'-krde. A' mrlx kc tqplzpxle nrpa kx kabz Gct, okatrle lrmakxtr atwrnrngr.

<sup>5</sup> Suti drtwrnge kx nimu amrlx nakrlzamu nzymne-krbzmu mz Gct mz natq lr mrkzbleng. A' sutitx zlwz drtwrnge kx naplzpaxamu nrpa kx kabz Gct. Murde mrlx kx plzpxle nrpa kx kabz Gct, nzokatr-krde lrmakxtr myaszpxle mrlx kx ycmne txpwz mz Gct mz natq lr mrkzbleng, a' trpipx-kzleu drtwr ngrde. A' nzmu napipx-kzle drtwr ngrde, mrlx lcng li nzrsakrlrng mz nzokatr-krdr lrmakxtr.

<sup>6</sup> Mzlangeng x inwengeng, nzmu naycmnebo mz Gct mz natq lr mrkzbleng, mz nzyrlwr-lxblr-krngu, trkrlzleu nzokatr-krde nimu. Murde mz nzokatr-krnge nimu naycmnebo bamu mz natq kx krlzamu, mz nzyapwxtipx-krbo bamu

da kxyc-kapq kx aelwapx-ngrm Gct bange, o mz nzipix-krbo nrpa ngr nzkrlzng, o mz nzplzpx-krbo nrpa kx kam Gct bange, o mz nzalvztrkrnge natq Gct.

<sup>7</sup> Na-aoti drtwrmu nzyrnkr gita. Nzmu trnzamqngi-zpwxu nqvi lrdeng, rblx nzkrlzkrmu nabz kc tzayrningr gita kc, x trokatrleu nimu nzngkrmu nabz lc.

<sup>8</sup> X na-aoti kz drtwrmu ngrlrvea nzvxutrkrde trpu. Nzmu natqde trnaopxleu, rblxbz mz ncblo ngr vea nedeng nzoliqti-krdr nzotangr.

<sup>9</sup> Kxmu-kzle lc mzli kc tqangio-ngrnamu. Nzmu natq ncblo kx trpnzng kx rkrlz, rblx nzokatrkrde leplz. Nzycmnekr ncblo kxmule lcde mane, murde vz lxlrtngr.

<sup>10</sup> Da zpwxtx kx natq kqlu mrka mz nrlc, x natq lcdeng amrlx kzdung leplz nzyrplatitr nardr.

<sup>11</sup> A' mz nzycmnekr ncblo mz natq kx trkr-lzwxu, apumle bange lr mrkzble, x apu-kzpo bade lr mrkzble, murde trkrlzkru nzycmne-etrkrgr.

<sup>12</sup> Kxmu-kzle lc mz nimu. Mz nzvqtikr drtqmu zmatq ngr nzwzng lcngr, mrlz nzsutikzkr drtwrmu zmatq ngr nzaxplrng lrmakxtr.

<sup>13</sup> Mz nzmukrde lcde, ncblo kx twzpele zmatq ngr nzycmne-ngrbz mz Gct mz natq lr mrkzbleng, nakrka'-ngrbzle bade zmatq ngr nzipixng drtwr ngr natq lr mrkzble lcngr.

<sup>14</sup> Murde mzli kc tqycmne-ngrbo mz Gct mz natq lr mrkzbleng, mqngrnge krka', a' drtwrnge trprtrpwzu mz nzkrka'ngr lc.

<sup>15</sup> Delc, pnzpe drtwrnge kx mqngrnge sa

nakrka'bz x nangrbz mz Gct mz natq lr mrkzbleng mz nzangio-krnge nide mz nzmnc-krnge esz'-krnge. A' drtwrnge sa nakrka' x nangrbz mz Gct mz natq leplz kcng tqangio-lxblrkr badr. X navz-nqblqamu natqngc lcnq.

<sup>16</sup> Murde mz nzglqpx-krm Gct x nzawi-krbzme bade mz natq lr mrkzbleng, rblxbz mz kztemqng nzesz'tikr drtwrmu badr mz nzkrka'-krm lc.

<sup>17</sup> X nzkrka'ngr kxmule lc, takitrde nzawigrbz mz Gct, a' trokatrleu leplz.

<sup>18</sup> X awi-ngrbo mz Gct kx nzymne-krbo bade mz natq lr mrkzbleng myaszpx-zlwzle nimu. A' alex da lc mz nzmnc-krnge esz'-krnge.

<sup>19</sup> Murde mz nzyrlwr-lxblrkr lrmakxtr, mz drtwrnge nzpipx-krbo mz leplz nrpa kxmrbc kx yrplatitr nardr myaszpx-zlwzle nzymne-aboi-krbo mz Gct mz natq lr mrkzbleng, kx tryrplatitru nardr.

<sup>20</sup> Mzlengeng x inwengeng, mz zmatq ngr nzwzngc lcnq, bzkq apuamu doa kxnztopwzng mz nzktitxpx-krmu zmatq ngrdr. A' na-apuamu ncblo kxbrpe mz nzwz-krmu mz zmatq lcnq mz nzokatr-krmu kztemung. A' mrlz kz nzapu-krmu doa kxnztopwzng murde trpnzu drtwrdr nzprtr-zvzngc mz da kxdrka'ngr.

<sup>21</sup> Mz Nzryrnrkxtr, rpi Yawe kx, *“Sa naycm-nebo mz leplz nengeng mz natq lr mrkzbleng. Sa nangi rkk ngr nzayrplapx-krnge nidr murde trnzlxngitilru natqngeng. Kxmule-esz', a' sa*

*napxtxpx-zvz-ngrdr nzvz-nqblq-krdr ninge.*" ☆ \*

<sup>22</sup> Mz nзму-krde lcde, nzymnekr kzdq kxrlxn-giti mz natq lr mrkzbleng x trpnzngr doa kx rpiplx drtwr ngrde, trngiu rkx ngr nzabrtzlvzkr Gct nide. A' sa nangi kz rkx ngr nzayrplapxkr Gct kxtrnzrlxngitiung. Murde mz nзрxtxpx-krdr nzymnengr kxnmulr lcng, sa napxtxpx-kz-ngrdr Nrpakxmrlz, x nzprtrbeng mz nzayrplapxngr. A' nzplzpxkr kzdq kxrlxngiti nrpa kx kabz Gct bade, ngi rkx ngr nzabrtzlvzkr Gct nide, murde okatrlе kxnzrlxngiting x tratrkatileu kxtrnzrlxngitiung.

<sup>23</sup> Mz nзыrlwr-lxblrkr dzbe lrmakxtr nyzmu, trmrlzu nimu amrlx nzymne-krbzmu mz Gct mz natq lr mrkzbleng. Murde nзму kxtrnzrlxn-gitiung o kxtrnzkrzlzru zmatq lc, kx nzprtrpzng bamu, sa narpilr kx lukurnr-ngrnamu o aycm-nele nimu drka'.

<sup>24-25</sup> A' mrlz nimu amrlx nzplzpx-krmu nrpa kx kabz Gct bamu. Murde nrpa lcng amrlx nzkrzlzr nzprtr-krdr mz nabz leplz lcng mz nzaelwapx-krbzlr badr kx nzaleng alwx x takitrde nzayrplapxkr Gct nidr. X naokatrlr nidr mz nzteqtr-krdr nqmq nr drtwrdr mz nzlxngiti-krdr Jiszs. X sa nayrngzobzng mz Gct mz nzangio-krdr nide. X narpilr kx, "Gct sc tqmnc-zpwxzb bamu mrka."

---

☆ **14:21** Asaea 28:11-12 \* **14:21** Suti drtwr Gct kx leplz nedeng nakrlzlr kx ycmne-kaipz badr mz natqdr, a' nзрxtxpx-ngrdr nzvz-nqblq-krdr nide. Mz nзумі-krde lcde, ayрplapxle nidr mz nzrlr-krbzle mz lr Asiria nzaovxio-krdr nidr. X lrmrkzble lcng nzymnengr mz natq kx rblxbz mz lr Israel nzxlrng. Natq lr mrkzbleng ngi rkx ngr nzayrplapxkr Gct kxtrnzrlxngitiung.

*Nqmq Ngr Nzyrlwr-lxblnng Kxmrlz*

<sup>26</sup> Mzlangeng x inwengeng, da kx navzpxmqng mz nzalvztr-krnge lc nide sele. Mz nzyrlwr-lxblr-krmu takitrde doa kxesz' mz nimu nzprtr-krde mz nzangiongr lc, mz nzrlwx-krbzle kzdq nabz kxtr, o mz nzalvztr-krbzle kzdq da, o mz nzaelwapx-krbzle kzdq da kxyc-kapq, o mz nzycmne-krbzle mz Gct mz natq lr mrkzbleng, o mz nzrpipx-krbzle drtwr ngr natq lr mrkzble lcng. Murde da kxmyapxbz nzokatr-krmu lr-makxtr atwrnrngr.

<sup>27</sup> A' mz nzaki-krmu nzycmnengr, rlrtr-ngrpwo leplz nali o natq kx naycmnebz mz natq lr mrkzbleng. X trtakitrdeu nzycmne-krdr mz nzwrde kxesz'. X nangi dq doa kx napipx-zvzbzle drtwr ngr natqdrng.

<sup>28</sup> A' nzmou kx trpnzngr leplz kx rkrlz nzrpipxng drtwr ngr natq lr mrkzble lcng, e leplz kcng tzymcneng mz natq lr mrkzbleng namnc-lrping x naycmne-nabu-tpwzng esz'-krdr badr Gct.

<sup>29</sup> X mou, rlrtr-ngrpwo leplz nali o natq kx narplzpxng nrpa kx kabz Gct badr. X kztedrng naobqtrpzng mz nrpa lcng mz nzrkrlzngr kx nztubqng amrlx o mwx kzdung natqdrng vz-rbr, murde drtwr ngrdr tr-rsakrlr-ngru mz Nzryrn-grkxtr. Mz nibr nzycmnekr kzdq doa, vz-nqblq-mouamu nqmq lc x rlr-ngrbzmou mz kzdung kz leplz kxli o tq nzplzpx-kz-krdr nrpa kx kabz Gct badr.

<sup>30</sup> Nzmou kzdq doa tulz mz nzplzpx-krde nrpa kx kabz Gct bade, x mzli lc tqycmne-ngrde, Gct ka-kzpze kzdq kz nrpa mz kzdq kz doa, doa krali



lc natulz. X krkc kai nawxbuo x namnc-lrpi mzli kxpipz mz nzrlr-ngrbz mz doa krali nzplzpx-kz-krde nrpa scde. X krkc kai sc tqplzpxpe-moule nrpa scde mz nzayrkrpx-krdele.

<sup>31</sup> Mrlz leplz amrlx nzplzpx-krdr nrpa kx kabz Gct badr, murde leplz amrlx naxlrlr nrpa lcnq x na-apqtrpzlr drtwrdr.

<sup>32</sup> X mz zmatq ngr nizrplzpxngr nrpa kx kabz Gct badr, zmatq lc ycpbz badr mz nzaclve-krdrle. Murde Mqngrkxtr trpnzng nztulrtr-krbzle mz leplz nzaelwapx-krbzlr zmatq lcnq tqkabzle badr.

<sup>33</sup> Murde mz dzbe lrmakxtr amrlx nyz Gct, trsutiu drtwrde lrmakxtr nzale-krdr da kx tropxu mz nzrkrlyzkr leplz. A' suti drtwrde kx da amrlx namwitr-lxblrng mz nrw.

<sup>34</sup> Kzdung nimu nzvz-rbrng mz nzrpi-krmu kx, "Olvz bzkq nzymneng mzli kc tqyrlwr-lxblrngu. A' namnclybzng mz zmatq ngr ncblo ngrdrng, da kc tqwai nzpikr Lou sc Mosis le.

<sup>35</sup> Nzmu kx tzsuti drtwr olvz nzkrlyz-krdr kzdung da, naveati-krlyzpwzlr mz ncblo ngrdrng mz ma nyzdrng. Murde myangr drtq olvz nzymne-krde mz nzyrlwr-lxblrkr lrmakxtr." †

<sup>36</sup> Vz-rbramu murde natq Gct trvzpxpuu bamu. Bzkq glqpx-lzbqamu mz nzrpi-krmu kx nimu

---

† **14:35** Kxnzetu r Nzryrngkxtr drtwrdr tresz'tiu mz drtwr ngr ngalrde lcnq li, 34-35. Mz nzrtekqtr-krgr mz Natqgu, vz-nqblqkr ncblo kcng tzrpilr kx ngalrde lcnq trngiu drtwr Pol, a' ngi drtwr kzdung lr Korint. Murde natq lcnq trnezsz'tiu mz kzdung kz natqdeng mz kzdung kz ngalrdeng. X mou Lou sc Mosis trpileu kx olvz bzkq nzymneng mzli kc leplz neng Gct tzryrlwr-lxblr-ngrdr.

txpwz kx rkrlz nzyokaetipxngr drtwr ngr natqde.

<sup>37</sup> X nimu leplz kcng tzipilr kx rngiscmu zmatq ngr nzrplzpxngr nrpa kx kabz Gct o zmatq kc-kzng tqkabz Mqngrkxtr mz leplz, nakrlzamu kx da lcng amrlx tqpipxbo bamu ngi natq kx katimqng Kxetu rgu Jiszs.

<sup>38</sup> A' bzkq vz-nqblqamu doa kznike trglxleu nztubqkr natqngc lcng.

<sup>39</sup> Mz nzmu-krde lcde, kx mzlengeng x inwengeng, navqti drtqmu nztwz-krmu zmatq ngr nzrplzpxngr nrpa kx kabz Gct. A' bzkq rpwa'-ngrbzmu mz leplz nzymne-krbzlr mz Gct mz natq lr mrkzbleng.

<sup>40</sup> Mz nzyrlwr-lxblr-krmu, aleamu da amrlx mz nqmj kxmrlz kx takitrde nzmnc-zpwx-krmu.

## 15

### *Jiszs Tulz-mop Mz Nzbzngr Mz Nrkrdrdqde Angidr*

<sup>1</sup> Mzli ka, kx mzlengeng x inwengeng, napi-mopwo bamu Nrpakxmrlz kc tqyapwxtipebo bamu. Lxngitiamu Nrpakxmrlz lc x rpiamu kx sc tqvz-zvzbe nztu-amqngi-krmu elr.

<sup>2</sup> X mz nztu-amqngi-krmu mz da lcng tqalvztr-ngrne nimu, sa naprtr-kzamu mz nzrlapxngr x da kxmrlzting amrlx kx nzvzpxmqng mz Nrpakxmrlz lc. A' nzmu nzrlxngiti-krmu kx tqpi txpwz naomu le, trnaprtrwamuu elr.

<sup>3</sup> Aprcpebo bamu nzalvztrngr kx nzka-kaipqng aposol kc-kzng bange. Da lcng tqlxngitiku kx myapx-esz'ngr nidr seleng. Nzbzkr Kraes xpele

alwx ngrgung, murde Gct naipqle nigu, da kc tqwai nzpikr Nzryrngrkxtr le. ✧

<sup>4</sup> X nzyrtzmq x Gct atulz-mople nide mz zbq kratq ngr nzbz-krde, da kc tqwai nzpikr Nzryrn-grkxtr le. ✧

<sup>5</sup> Zbz adcpX-lzbqBz mz Pita, x mz nibrde badr ncblo nedeng kcng nzpnu-esz'-nrade-li. \*

<sup>6</sup> X mz nibrde, adcpX-lzbq-mopwz badr kxnzr-lXngiting nzmyaszpxlr trtqki-kxnzlvqn (500) mz nzwrde kc esz'. Kxmule-esz' kzdung nidr nzbzpeng, a' nzkqlung kx nzlubeng mzli ka tqryr-ngrbo bamu. X nzkriz-angidr-kzlr kx tulz-mop mz nzbzngz mz nrkrdrtdqde.

<sup>7</sup> Zbz adcpX-lzbq-kzpz mz mzlede Jemes, x mz nibrde adcpX-lzbq-kzpz badr aposol nedeng amrlx. ✧

<sup>8</sup> X kzdung yiz mz nibr nzvzdz-krde Heven, adcpX-lzbq-kzpq bange. ✧ X mz nzlxngi-atekrnge nide, apux doa kx nzmika-rbr, a' twzpele nzlungr.

<sup>9</sup> Murde kxmule-esz' mzli kc tqatrkati-zlwzx lrmakxtr ne Gct, x trtakitrdeu nzngini-krnge aposol nede, a' mzli ka prtrpebo badr, kxmule-esz' tr-rsakrlr-ngrgru badr mz nzmyalz-krdr. ✧

<sup>10</sup> Nzlxngiti-krnge Jiszs x nzngini-krnge aposol nede nzvzpxmqng mz zmrlz ngr Gct kxmyalz. X zmrlz ngrde lc trmaneu, murde nzyapwxtipx-krnge Nrpakxmrlz mrkang kqlu myaszpx-zlwzle

✧ **15:3** Asaea 53 ✧ **15:4** Sam 110:1; Hosia 6:2; Jona 1:17;

Luk 24:46; Aposol 2:25-36 \* **15:5** Kxmule-esz' Judzs bzpe, a' nzrlwxtr-kzpz mz ncblo neng Jiszs kcng nzpnu-esz'-nrade-li.

✧ **15:7** Galesia 1:19 ✧ **15:8** Aposol 9:1-19 ✧ **15:9** Aposol 8:1-3; 9:1-2

nzwzkr aposol lcng amrlx. A' trtakitrdcu nzglqpx-krdr ninge mz da lc, murde nzwz-krnge vztzpxpwq mz zmrlz lc tqmyalz.

<sup>11</sup> Kxmule-esz' krkc tqyapwxtipxbzle Nrpakxm-rlz bamu, nidr o ninge, a' sc tqlxngitipeamu mz nzxlr-krmule.

*Nrkrdrdq Kxnzrlxngiting Sa Natulz-kzp Mz Nzbzngr Mz Nzvz-nqblq-krde Nztulz-krm Nrkrdrdq Jiszs*

<sup>12</sup> Mz nzlxngiti-krmu Nrpa ngr Kraes, bzkq rpi-  
amu kx trpnzngr nzatulz-krm Gct kxnzrlxngiting  
mz nzbzngr. Murde da amrlx kcng tqlxngitiku  
nztuong mz nzatulz-krm Gct nrkrdrdq Jiszs mz  
nzbzngr.

<sup>13</sup> Nzmu natrpnzngr nztulz-krm nrkrdrdq mz  
nzbzngr, drtwr ngrde kx trnzatulz-kzpuu Kraes  
mz nzbzngr.

<sup>14</sup> X nzm Kraes nabz-alole, drtwr ngrde  
kx nzryapwxtipx-krgr nigr aposol mane x  
nzrlxngiti-krmu ngi brmrda.

<sup>15</sup> Murde nzm Gct trna-atulzpe-mopleu Kraes,  
aelwapx-ngrde kx pokiatitrkr Gct, mz nzrpi-krgr  
kx atulz-mople nide mz nzbzngr. Drtwr lc  
navzpxm mz nzrpi-krmu kx trpnzngr nztulz-krm  
nrkrdrdq mz nzbzngr.

<sup>16</sup> Murde nzm natrpnzngr nztulz-krm nrkr-  
drdq mz nzbzngr, drtwr ngrde kx nrkrdrdq Kraes  
mncz-alom mz gq.

<sup>17</sup> X nzbrtikr drtwrmu nide nzarlapx-krde  
nimu ngi brmrda. Murde trpnzngr nzipqpxngr  
alwx ngrmung x sa naprtramu mz Hxl,

18 da kc tzwai kxnzrlxngiting amrlx kcong tzbzszpelr nigu. †

19 X nzmu natrpnzngr nzprtr-krgru mz nzlungr kxboi kalr; mane mzli ka mz nrlc ka nzobqtipx-zvz-krgru da kx nakam Kraes bagu kalr mz nrlc kc navzm. X takitrde leplz nzyckr mz drtwrdr nigu, mz nzrlxngiti-nrbalq-krgru lc.

20 Kxmule-esz', a' dazpwxtx kx Gct atulz-mople Kraes, mz nzngini-krde doa kx ayrnrngr kx natulz-mou-ngrmle mz nzbzngr x trpengr nzbz-krde. Murde kxnzrlxngiting kxnzbzpeng amrlx natulz-kzpqng mz nzbzngr kalr. ☆

21 Murde nzbzngr prtzbz mz leplz amrlx vzpx-ngrmle alwx ngr ncblo esz', kc tqngi Adzm. X kxmu-kzle lc, nztulz-krm nrkrdrdq mz nzbzngr naprtzbz mz kxnzrlxngiting amrlx vzpx-kz-ngrmle nztulz-krm ncblo esz' kc tqngi Jiszs.

22 Leplz amrlx nzbzngr murde nzprtrpzng mz Adzm. X leplz amrlx kxnzrlxngiting sa nalu-mopqng murde nzprtrpzng mz Kraes.

23 A' nzlu-mou-krm leplz sa navz-nqblq-angidrle mzli rde kc tqyrlq Gct. Murde Kraes nanginide doa kx ayrnrngr kc tqtulz-mou-ngrmle mz nzbzngr a' trpengr nzbz-krde. X mzli kc nayzlu-mou-ngrmle, leplz nedeng sc natulz-ate-kzng.

24 X mz nibr da lc, sc tqkrlzpebzle nzykrpxkr nrlc ka. Mzli lc, Kraes sa naodati-kaile enqmi rdeng amrlx, kxmule-esz' ncblo o drka' x kxmule-

† 15:18 Gct mz nzatulz-mou-krmle Jiszs mz nzbzngr, aelwapx-ngrde kx nzbz-krde lc ngi blz kx takitrde nzrkax-krde alwx ngrgung amrlx. ☆ 15:20 Aposol 26:23; Rom 8:29; Kolosia 1:18; Hibru 1:6

esz' kxznzetur, kxznzmatqng, o kxznzactlveng. X sc na-aprc-atebzele doa x da amrlx mz Gct Trtede.

<sup>25</sup> Murde Kraes nangini-kaide King, navz navz mzli kx nzamnclz-ngrbz enqmi amrlx mz zmatq ngrde.

<sup>26</sup> X nzbzngr apu-kzle enqmi murde atrkatile leplz. A' Kraes sa naodati-kzle zmatq ngr nzbzngr lc.

<sup>27</sup> Murde rpi Nzryrngrkxtr kx, “Gct yrlqlzbzele doa x da amrlx mz zmatq ngr Kraes,” ✧ (kxmule-esz' leplz, enjrl, drka', animol, o da kxtrnzluung), “mz nzmetx-krbzlr bade.” ✧ A' opx angidr kx Gct Trte trprtrpwzu mz “doa x da amrlx lcng,” murde tramnczpwzleu nide esz'-krde mz zmatq ngr Mrlxde Kraes.

<sup>28</sup> X mz nibr Gct Trte nzyrlqlz-krbzle doa x da amrlx lcng mz zmatq ngr Mrlxde Kraes, Mrlxde sa na-amncz-kzpzle zmatq ngrde lc tqmyalz-esz'ngr mz zmatq ngr Trtede. X mzli lc, doa x da amrlx lcng sa navz-nqblq-moulr me pnz drtwr Trtede.

<sup>29</sup> Kzdung nimu mrla, nzlukurnr-ngrdr mz nzrpi-krdr kx trpnzngr nztulz-krm nrkrdrdq mz nzbzngr, x mzli lcpwz nzwrkxtrng mz nztekqtr-krdr leplz kxznzbpeng, murde mz drtwrdr sa naokatrle nidr. ‡

<sup>30</sup> ?X nzmu natrpnzngr nztulz-krm leplz mz nzbzngr, memule nigr aposol tqrlrpx-lzbq-zvz-

---

✧ 15:27 Sam 8:6 ✧ 15:27 Sam 110:1 ‡ 15:29 15:28 Da kc tzwai-pnzlr mzli kc Adzm trtaoka-ngrde mz alwx. 15:29 Trpnzngr kxrkrlz namrlzu r nazwrkxtrngr lc. A' opxm kx drtwr Pol tresz'tiu badr mz nazwrkxtrngr lc, murde abzo mzli kc krlzmle mzli ka, namrlzu r nazwrkxtrngr lc trnzaleu lrmakxtr.

ngrgr mz nzaetq-ngrbz drtqgr mz nzyapwxtipx-krgr Nrpa lc?

<sup>31</sup> Mzlengeng x inwengeng, mz zbq kang kqlu leplz nzrpilr nanibqlr ninge, murde yapwxtipxx Nrpa lc. A' vqti drtqngge nzale-krnge nzwznggr lc, murde abrtzlvz-zlwzx Kxetu rgu, Jiszs Kxnmcpix mz nzteqqr-krde nqm q krmu kc tqvzpxm mz da angidr kcng tqalvztr-ngrne nimu.

<sup>32</sup> Kzdung ncblo mrka mz taon Efiszs, drka' mncpxm badr, x nzatrkatilr ninge. A' kxmuleesz' nzrpwa'-ngrmlr nzwz-krnge, a' tu-amqngi-zvzx mz nzyapwxtipx-krnge nrpa kx Gct atulz-mopele Jiszs mz nzbznggr. A' nzm natrpzngr nztulzkr leplz mz nzbznggr, nzwz-krnge mane, x trpnznggr nrade kx nayrlq-zvzbzle. X opxm kx mrlz nzvz-nqblqnggr drtwr kx rpile kx, *"Na-ale-tpwzku da kxmrlzm bagu mz nzmux-krpwzku x nzrmnqtx-krpwzku, murde ycpe pipz nzbz-krgr."*

☆

<sup>33</sup> A' bzkq nzesabrtingr nimu mz nzvz-nqblq-krmu natq lc. Murde nakrlzamu kx mz nzprtr-krbzmu mz leplz kx nzvz-rbrng mz nzrpi-krdr kx trpnznggr nztulz-krm leplz mz nzbznggr, nzaokrdr drtwrdr lc tqtrka sa na-atrkatile nzaokrmu drtwrmu kxmrlz.

<sup>34</sup> Aclvetio-lzbqamu! Nzale-zvz-krmu alwx naesakipe! X namyangr drtqmu. Murde leplz kcng tzalvztr-ngrdr nimu da kvz-rbr lcng, trnzkriz-pnzlru Gct.

*Nrkrdrtqgu Kxmna Kc Natulz-mopqng Kalr Ngi Nrkrdrtg Kxblepxng*

<sup>35</sup> Mwx kzdq nimu narpile kx, “?Myx kxnamu na-alu-moungr namz ngr leplz? ?Sa nangi mou nrkrdrdq kxmibi?”

<sup>36</sup> Ngqngu-plxsrq! Murde da kx nzpetio mz drtc' namibio kai mz nzlrtipx-krde da kxmrna kc nalvclzm.

<sup>37</sup> Rtg da kc tzpetio nzobq-krde blepxbz mz da kc nalvclzm.

<sup>38</sup> A' Gct yrlqle drtwr kx da kc nalvclzm mz rtg, navz-nqblqle rtg kc tzpetiong.

<sup>39</sup> Nrkrdrdq amrlx tr-rsakrlr-ngru. A' nrkrdrdq leplz, animol, utc, x nc nzbletipx-lxblrng.

<sup>40</sup> X nrkrdrdq kxnmncng mz nrlc ka nzbletipx-lxblrng mz nzobqkr dalr bongavz. X nzlqngipxkr dalr bongavz nzbletipx-lxblr-kzng mz nzlqngipxkr nrkrdrdq mz nrlc ka.

<sup>41</sup> X mou, nzlqngipxkr nepi, temz, x vring nzbletipx-lxblrng, da kc tqwai-kz nzobqkr vri amrlx.

<sup>42</sup> Kxnamu-kzle lc mzli kc na-atulz-mou-ngrmqng Gct leplz kxnbzpeng. Murde nrkrdrdq kc tzyrtzmq mz drtc' krlzle nzbzng. A' nrkrdrdq kc tqlu-mop blepxbz bade, murde trkrlzleu nzbzng.

<sup>43</sup> Nrkrdrdq kc tzyrtzmq yangrng x nzobq-krde trka, a' mzli kc na-alupe-mou-ngrmle nrkrdrdq lc naxplr x nzobq-krde nalqngipx.

<sup>44</sup> Nrkrdrdq kc tzyrtzmq ngi dalr nrlc ka, a' nrkrdrdq kc tzalu-mop mz zmatq ngr Mqngkxtr takitrde nzmnc-alo-krde Heven. Nakrlzamu kx nzmncr nrkrdrdq mz nrlc ka ngi rkx ngr nzmnc-kzkr nrkrdrdq kxmrna Heven.



<sup>45</sup> Murde Nzryrngrkxtr rpilē kx, “Adam, kc tqngi ncblo kc kai nginide leplz kxlu.” ☆ X leplz amrlx nzbzng mz nzprtr-krbzlr bade. A' Kxnmcpx vzm, mz nzngini-krde ncblo kc kai tqlu-alo, x kabzle nzlungr kxboi mz leplz nedeng amrlx.

<sup>46</sup> A' mzli ka, trtwzkaku nrkrdrdqgu kxmrna kx natwzku kalr Heven. A' mncbeku mz nrkrdrdqgu mz nrlc ka.

<sup>47</sup> Adzm, kc tqngi ncblo kc kai vzpxm mz nrlc ka. A' Kxnmcpx, kc tqngi ncblo kxmrna, vzpxm Heven.

<sup>48-49</sup> Leplz kcng tzvzpxmqng mz nqvi lr ncblo kc kai, nrkrdrdqdr bz x mibi, mz nzapu-krdr nide. A' nigu kcng tzvzpxmqng mz nqvi lr ncblo kxmrna, nrkrdrdqgu sa nalu-along Heven, mz nzapu-krgr nide.

<sup>50</sup> Mzlengeng x inwengeng, nayokaetipxbo dq da bamu. Mzli ka nrkrdrdqgu bz x mibi, x nrkrdrdq kxmule lc trpnzngr nzprtr-krde Heven mz nzlu-alo-krde elr.

<sup>51</sup> Gct aelwapx-ngrmle bagu kx mzli kc nayzlu-ngrm Kxnmcpx, kzdung kxnzrlxngiting nalubeng. A' mzli lc kxnzrlxngiting amrlx sa nalrtipx-aning, kxmule-esz' nzlubeng o nzbzpeng.

<sup>52</sup> Murde kzdq kc enjrl sa navxutrle trpu kxrmnr-ngrbz, x mzli lcpwz leplz kxnzbzpeng sa natulzpemqng mz nzlungr kxboi, x nrkrdrdq kxnzrlxngiting amrlx sa nalrtipxng mz nrkrdrdq kxmrna. ☆

---

☆ 15:45 Nou 2:7 ☆ 15:52 1 Tesalonika 4:15-17; Nzaelwapxngr 10:7; 11:15

<sup>53</sup> Nrkrdrtdq kcng tr-rblxu nzbz-krdr nalrtipxng mz nrkrdrtdq kxmRNA kx trnzkrzlzru nzbzngr.

<sup>54</sup> X mzli lc tzlrtipxng, sa na-atutrle Nzryrn-grkxtr kc tqrpilc kx, *Zmatq ngr nzbzngr nzaovxio-along!* ✧ Murde kxnbzbpeng sa nalu-mopqng x trpengr kx nabz.

<sup>55</sup> X narpi-kzku kx, *“Nzbzngr nzodatitx alo mz nzvecngr! X trpengr zmatq ngrde mz nzaetq-krde drtqgu.”* ✧

<sup>56</sup> Murde zmatq ngr nzbzngr mz nzaetq-krde drtqgu, vzpxm mz alwx rgung, mz nzrpiqr Loukxtr kx krkcng amrlx tzaleng alwx nabzng.

<sup>57</sup> A' awi-ngrbzku mz Gct nzprtr-krbzku mz Kxetu rgu Jiszs KxnmcpX mz nzaovxio-krde alwx x nzbzngr, x trmnclzpepwzkuu mz zmatq ngrdr.

<sup>58</sup> Mz nzmu-krde lcde, kx mzlengeng x inwengeng, bzkq vecpx-lzbqamu mz nzbrtikr drtwrmu Kxetu rgu, a' tu-amqngi-zvzamu. X rlrpx-lzbqamu mz nzwzngr kc tqaprcbz Jiszs bamu, murde nzwz-krmu trnamaneu, a' rpilc kx nrade nayc-zvzbz.

## 16

### *Nzatakqtingr Trau Mz Nzwzkr Lrmakxtr*

<sup>1</sup> Mz letz scmu, rlxti-kzpa'mu bange nike na-aleamu mz nzatakqti-krmu trau kx na-atwzlr-ngrbzmu mz lr Jerusalem kxnrzlxngiting kx trpnzngr scdr da. X suti drtwrnge kx navz-nqblqamu da kx pipebo mz dzbe lrmakxtr kcng mz provins kc Galesia.

<sup>2</sup> Mz Sade kang kqlu, mz nzmnc-krmu ma nyzmung, doa kx esz' mz nimu, nakapxle du trau mz nzwzngr lc, mz nzvz-nqblq-krde nike atatrple. X rtxlvz lz zvz trau lc mz Sade kang kqlu, murde bzkq atakqtipeamu trau mzli kc navz-ngrmc.

<sup>3</sup> Mzli kc nakaputr-ngrbo bamu, sa nayrbo du letz badr kztegunng kxnzrlxngiting, murde letz lcng naokatr lr ncblo kcng tqmcpxamu mz nztwz-krbzlr trau scmung mz lr Jerusalem.

<sup>4</sup> X nzmz kx tqmrlz kz nzvz-krgr badr, mwz sa navzkr badr ncblo lcdeng.

*Natq Ngr Nzvzpxkr Pol X Natq Kx Na-abrtzlvzngr Timoti*

<sup>5</sup> Sa naoklatimc nimu mz nibr nzoklati-kai-krnge kztegunng mz provins kc Masedonia.

<sup>6-7</sup> Murde nzmz naoklati-kaipc' nimu, nzmnc-krgru mzli mrbcnepwz. A' suti drtwrnge nzmnc-krgru mzli naboitx, kxmule-esz' temz kxli o tq nzmz kx tqrlr-ngrm Kxetu le. X mz nibrde, mrlz nzokatr-krmu ninge mz nzvzpx-krnge mou drlveke navzkix.

<sup>8</sup> A' nzmnc-krnge mrka Efisz nakrlzbzle mzli kc tzmulvzngr nzrlakilz-ngrm wit, zbq kc tqvzo-ngrm Mqngkrxtr.

<sup>9</sup> Murde mzli ka ngi mzli kx mrlzpe mrka, mz nzyapwxtipx-krnge Nrpakxmrlz. Leplz nzklung kx nzabrtrpebzlr drtwrdr mz Jisz. A' mzli lcpwz, leplz nzklq-kzng kx nzrpwa'-ngrmlr nzwz-krnge lc.

<sup>10</sup> Mzli kc Timoti nakrlz-ngrbzle nimu, abrtzlvzamu nzvz-krmle x aclve-angidramu nide. Murde wzkr badr mz nzwzkr Gct, x takitrde

nzamatq-krmu nide mz nzngini-kz-krde kxetu  
mz lrmakxtr. \*

<sup>11</sup> Bzkq obqszoamu nznginibe-krde obla. A'  
okatramu nidr badr kztedeng mz nyzylu-mou-  
krmlr bange. Murde obqtipxx nzmcmou-krnge  
nidr.

<sup>12</sup> Mz letz scmu, rlxti-kzpa'mu bange nzatwzlr-  
krbo Apolos bamu mz nzalvztr-krde nimu. X  
apqtrpo drtwrde mz nyzylu-krbzle bamu badr  
kztegung kcng tztwzmlr letz scmu bange. A' rpile  
kx trsutiu drtwrde nzvz-krbzle bamu mzli ka, a'  
sa navzbz mzli kx takitrde.

### *Kzdung Kz Natq Mou*

<sup>13</sup> Aclvetio-lzbqamu! X tu-amqngi-zvzamu mz  
nzrlxngiti-krmu. Kxmule-esz' da kx prtz, a'  
nelzmu nabr.

<sup>14</sup> Da amrlx kcng na-aleamu navz-nqblqle  
nqmq ngr nivz.

<sup>15-18</sup> Mzlengeng x inwengeng, abrtztx-ngrnge  
nzvz-krm Stifanas, Fortunatzs, x Akaekzs, mz  
nzkrzlz-krmlr ninge. Murde nzapqtrplr drtwrnge,  
da kc tzwai-zvzlr mz nzapqtr-krbzlr drtwrmu. X  
mrlzm bange nzxlr-krnge nrpa scmung.

A' mzli ka, mz nztwz-krbzlr letz scnge bamu,  
rngidrlvz-ngrbo bamu kx na-amatqamu ncblo  
kxnmulr lcong. Nadcpz mz drtwrmu kx Stifanas  
badr lr ma nyzde, nidr kx nzrlxngiti-ayrnrng mz

---

\* **16:10** Pol trsutiu drtwrde nztrkkr nzmnc-krbz Timoti badr lr  
Korint. Murde krlz Pol kx kzdung lr Korint nzpctxpx-ngrdr Pol  
nzngini-krde aposol x nzngyatikr drtwrdr nide. [1 Korint 4:17;  
Aposol 19:22]

provins kc Akaia. X nzrlrpx-lzbnqng mz nzokatr-krdr leplz neng Gct. Namnclzbnzmu mz zmatq ngrdr badr kztedrng keng tzaclveng badr.

*Natq Ngr Nzarlz-lzbnqng*

<sup>19</sup> Lrmakxtr keng mrka mz provins kc Esia nzrpibzlr bamu kx, "Nimu la." X Akwila badr olvz rde Prisila, x kxnzrlxngiting keng tzyrlwr-lxblrng ma nyzdr mz nzangiongng, nzrpi-kzlr kx nzmrlzti-zlwzlr nimu.

<sup>20</sup> X kztengeng amrlx keng tqwzkr badr nzrpi-kzpzlr bamu kx, "Nimu la." X mzli kc tqrmcti-lzbnqamu, male-lxblramu mqmu mz nivz.

<sup>21</sup> Abzo mz ngalrde lc yr-angidrx mz mqnge. Ninge Pol rpibo bamu kx, "Nimu la."

<sup>22</sup> Nadcpx mz drtwrmu kx doa kx trmrlztileu Kxetu mz nzvz-nqblq-krde natqde, namnclzbnz mz nzrpilzngng kc na-amncle nide mz Hxl kalr. X nakrka'-zvz-ngrgu kx, "Kxetu Jiszs, vz-anim!"

<sup>23</sup> X krka'-ngrne kx Kxetu rgu Jiszs naokatrle nimu mz zmrlz ngrde kxmyalz.

<sup>24</sup> Mrlztix nimu amrlx mz nzaxvctr-krbzku mz Jiszs Kxnzmcpx.

Delape. Ninge Pol. †

---

† **16:24** 16:19 Mzli lcde Akwila x Prisila nzmncng Korint x nzkrly-angidrlr kxnzrlxngiting mrlcde. [Aposol 18:1-3] 16:22 Pol suti drtwrde kx natekqtrlr nqm q nr drtwrd, murde ma tzayrplapxng mz nyzlu-ani-krm Jiszs.

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f